




1821





洪北江詩文集  
一九



Inches  
Centimetres  
TIFFEN® Color Control Patches  
© The Tiffen Company, 2007

Blue  
Cyan  
Green  
Yellow  
Red  
Magenta  
White  
3/Color  
Black



更生齋詩卷第七

陽湖洪亮吉著

西圃疏泉集

競渡燈船行

燈船尚隔三條橋寶氣已復衝層霄三橋百巷密如櫛  
波上慙慙人聲囂須臾赤焰將橋鎖分半樓臺燭光裏  
林鴉林鵲驚四飛鴉背鵲頭都帶火忽然龍爪攫半空  
千人萬人看燭龍橋回風勢亦稍緩龍忽正面停波中  
橋南百尺波如沸龍甲龍鱗照天地妖狐竄水魚登岸  
光景欲從何處避綠楊枝頭閣幾層無數紅袖圍紅燈  
船燈直與閣燈接咳吐落處雲霞烝百舟迎龍百舟送

別有百舟排不動三更以後抵北關一派火光飛入衙  
鉦聲已遠簫聲起裊裊聲驚入雲裏蜻蜓舟小琉璃暗  
有客添衣出蓬底雲溪我住三十年客夢只落雲溪邊  
回船復向溪上過衫影笠影人疑仙曙光矔矔斷更鼓  
千萬燭光收入浦君不見何如天上兩燈忙圓月乍傾  
圓日吐

跋錢三維喬自製擴銘及三幻圖說後

雖非祖道電河干

易水一  
名電河

紙上蕭蕭風色寒君是生魂

我生輓銀牋聊當白衣冠

太虛偶爾綴微塵詎有前身與後身多少樓臺雜松竹  
君皆疑幻我疑真

### 宗忠簡祠

六百年來氣不磨江干遺席鬱嵯峩迎門九派東歸海  
卧榻三呼北渡河夢裏銅駝餘涕淚望中鐵騎敢經過  
劉琨祖述應同傳未了忠心尙枕戈

### 陳少陽祠

少陽祠外駐征輪國士應知俎豆尊已覺舉朝忘二帝  
不妨在野蹈三仁捐軀子諒彈仙客並世朱雲值佞臣  
一樣書生心跡異酋前叩馬又何人

### 城渡橋訪明唐襄文讀書處

荆川臺址尙崢嶸卜宅當時愧未曾

余戊午乞假回將  
上居于此後不果

君慕古人三不朽我甘世事百無能牛腰卷軸傳難必

馬革功名謗已騰何似掩關長却掃白頭仍擁讀書燈  
讀晉書偶成

剩得荆揚半壁天偏安王氣尙綿延生憎謝客稱山賊  
死笑孫恩作水仙南渡化龍纔幾日北來飲馬是何年  
茫茫萬里中原土只惜無人肯著鞭

七夕京口淩江閣待友人不至率成四絕卽寄張文學  
峯郭孝廉壅暨及門于生淵

兩株高樹倚檐前却擁秋衾自在眠絡緯乍停蟬又響  
曉霞紅入寺門鮮

煉丹臺畔值佳辰也買甘瓜向曉陳不敢更談天上事  
久安心作謫仙人

北固潮頭未肯降忽驚人影出蓬窗誰言一葉舟偏小

滿帶秋聲過北江

年來百事總闌珊門外江流亦漲灘一枕水窗眠未醒

算來還比白鷗閒

是日過聽秋軒飯并觀瓜果筵作

華堂乞巧筵商略祀牛女天邊瓠包星筵上戲摘取

華堂乞巧筵商略坐宵永籬角牽牛花迢迢妒星影

陰晴客不知榮悴草無語門前洗手花門外洗車雨

天孫踏鵲橋中隔雲一片靈鵲不擡頭何由見仙面

千聲與萬聲蛩響一何切天邊方停梭地上已促織

天上星神過人間兒女忙欲知霄漢事除問杜蘭香

攜于生淵夜半剪江至焦山

百尺驚濤內呼舟半晚過夜帆明蟬螻秋浪狎龜鼉舊  
雨南徐少回風北固多到山山已黑撼樹且高歌

焦山

山頭高士壟山下大江潮一柱中流兀千年古像凋氣

猶凌北固名欲垂南譙

山本名譙山

且把心香燕魚龍未敢

驕

張秀才學仁寄糕圖

家山同百里各復感飄蓬我在昆侖上看君滄海東枕  
戈馳遠夢振袖揖長空咫尺天河近無須更使風

吾鄉錢生履坦在南昌日作梅花卷子寄萬刺史廷蘭

到日正值刺史八十四壽辰因繪爲長卷刺史并作

詩紀事邀同人共賦

此梅公手植梅壽亦輸公却喜南枝早香浮北屋中老  
來長句健客到一尊同他日花開處先酬百歲翁

翠屏洲

秋聲塞港口風急船不過江蘆明百頃一叟截江卧游  
鱗逐驚蛇居然上舟柁

嘉魚港

大水抱細水水盡波忽動中有百頃潭嘉魚歲堪種食  
之可平心兼乏江海夢

種竹軒

百竹綠牛村十竹綠一巷人從巷口立時與竹竿撞海  
上蟬竦來餘光半軒絳

巨公厓

重來巨公厓石石悉迎客惟餘一石傲壓客險及額石  
上雲亦奇孤飛上天直

初九日鄒水部文瓊載酒相訪因約同人松寥閣小集

分韵得聲字

難得新涼載酒行酒兵門罷門心兵江光入夢仍如練  
秋色博空若有聲悟後雨從衣上落醉餘天向笠邊橫  
京華舊事勞重說卧看潮頭滅復生

初十夜山半步月至三鼓始回

出門看山光月色忽無盡簾前秋景好花氣亦徐引江  
光山光新月光點入秋色逾蒼涼花香堂前一杯酒杯  
底清光無不有三更以後月愈明興發我欲凌波行秋  
花倘點頭秋竹若揺手秋鐘泠泠恍開口一風吹人入  
竹樓竹樓旁邊茶百甌茶香雖清客沉醉七尺竹牀三  
客睡花香亦若憐酒人忽灑花影來周身夜光齊收夜  
鐘歇却夢酒魂飛入月

十一夜東昇閣看盂蘭盆放燈作

一燈先出法界樓大魚迎燈爭逆流燈來大魚忽然竄  
一鬼一燈擎不亂三燈五燈波面停鬼欲待侶方同行  
有時一燈衆鬼擎惹得燈影皆深青燈光時分復時集

鬼臂壓魚魚直立燈光叢處鬼亦夥魚驚避鬼欲出波  
大聲軒然波上起盡捲燈光入雲裏鬼車鬼馬已四飛  
燈去鬼伯愁無依洲東洲西萬聲沸鬼氣居然避人氣  
樓頭仙客正朗吟激得波響如鳴琴君不見神燈紅鬼  
燈綠入海無心競遲速東梳燈影西上潮鬼勢瑟縮魚  
龍驕

萬刺史廷蘭邀集令子承紀丹徒官解小飲卽席賦贈  
萬爲壬申庶常前輩

方壺員島振公名八十年來始合井佳士盡看稱弟子  
靈光眞欲比先生南遊畫鷁仍須迓時約遊吳門東下  
飛蝗偶有聲適有飛蝗過今日宰官誠不易好傳良法

拯疲氓刺史居官  
舊有聲

江口待慧超僧不至却寄一首

松寥高閣不同登一榻慵眠醒未曾僧性  
荒嬾我憶放生池

上路秋花病雀與孤僧

月波臺夜坐

月色轉綠天光青松梢盡處明一星星光忽隨白露零  
倒射北斗光泠泠星光墮後山光暝竹屋居然覆漁艇  
三更向盡吹曉笳海上已復生紅霞

林下二髯圖爲萬刺史昆仲賦

北江一漁舟日昨泊北固欣逢西江叟相與話情慄叟  
顏如春髯若戟髯上泠泠流古色比肩令弟何不來與



共官齋話晨夕見公與公語別公展公圖我題詩贈公  
公見應軒渠君不見林泉不復營生計只有公家好兄  
弟一執奇書一如意石泉淙淙瀉奇氣石上松花積何  
膩山果投林有真味阿兄詩成屬余季老友寥寥亦堪  
寄石門前頭百級砌老木千章萬章蔽門外紅塵卽如  
沸一山遊完一山替五老八公時把臂我昔亦是神仙  
吏謫下九天居九地他時華髮倘下垂曳杖從公共遊  
戲

六月二十日偕同人載酒至城東陸氏中隱園看荷花  
至二鼓始歸率賦

今年水滿荷花低前後一月稽花期花期忽展六月杪

花朵如盤色逾好陸家荷榦捎城牆隔城薰風沸滿塘  
樣舟亭畔一雙燕聞信遠復來尋芳雛鶯縱老尙引吭  
蝶翅不待秋間黃花前十客羅百觴過午一一來追涼  
花枝迎客若問訊一客一花須坐近坐久未窮花底蘊  
花下蛩聲亦殊韵殘蟾出水光何隄花竟嫣然開笑口  
看花親切花轉羞花已低頭客濡首花梢蓮實花下藕  
花底誰人小垂手引得荷盤貯杯酒月影星光滿盤走  
看花旣足酒亦完花外尙有千琅玕深綠影護紅團藥  
不須更與花朵語花外鵲聲催客遽一半酒人穿竹去  
陸孝廉繼輅洞庭綠樂府

下第才人暗自傷忽驚奇福出尋常龍堂入夜波如海

別展鮫宮作壻鄉

玉茗花殘閣亦傾是誰拈筆與爭名到頭一例神仙夢

樂府新傳兩柳生

陸公子鎔邀至城北看荷花而客坐正與花相背率賦

一首 時將遊焦山

屋向南頭水北頭背花開讌我殊羞預愁簾蒜遮香氣  
聊折荷筒抵酒籌有客苦談當世事是誰能代古人憂  
深杯到手休辭醉明日征帆向潤州

清泉濯足長卷

門前水屋後山山深深水潺潺紅塵三十年足垢久當  
浴尋常一曲流又恐污吾足奇峯千疊谿九回溪流曲

處點碧苔客欲濯足時歸來足垢既濯登峯若飛盧敖  
仙人世外可期飛空游行有時倦展我北堂三萬卷吉  
金樂石東西列嗜硯居然又成癖周秦爨器唐漢碑硯  
材端溪復歙溪何日約客來搜奇我攜蜻蛉舟爾居鴻  
雁浦挂帆一日卽詣君與關一軒談邃古

年來里中賽神之會事事競勝較十年前費已百倍矣  
感而賦此時七月望日俗所傳中元節也

令節尋常事奢風幾歲開綺羅裁幟袞金玉裏輿儼神  
豈餘威及人爭罄產來徒充里胥橐一日醉三回

鳴鳩圖

占得危巢復幾時滿天風雨劇相思一枝費盡林鳩意

只有山禽總不知

江流斷處有停水數十步荷花盛開偶賦

黃雲昏處盡黃蘆留住荷花世界無渚上鷺絲爲料理

約風三日水平鋪

新構卷施閣成登眺偶賦

萬瓦縱橫內居然時一樓愛從雲盡處看到郭東頭世  
味都應熟吾生台少休掃梁迎舊燕相與話初秋

題范秀才來鳳鐵琴詩草

以鐵作簫以鐵作箏何如鐵琴聲出金石琴或以石琴  
或以銅何如鐵琴逸響遏空君家鐵琴詩堅古亦如鐵  
前古與後古試問欲誰敵一編能窺天地心白電掣屋

霜飛林我攜君詩及鐵琴海上落落求知音

月夜登北固更望金焦二山回途與友人憩演武廳小

飲作

更從石脊眺昏黃無盡江流入渺茫百歲過人疑短夢

兩山與月鬥圓光鷗鷺影逐浮漚沒蟋蟀聲隨墜露涼

北府健兒京口酒算來今日摠尋常

哭同年楊大令倫

一生心術及詩篇都復研摩到昔賢稷契許身聊復爾

君生平作詩服膺杜氏所義皇入夢致悠然填胃卷軸

逾三萬歸骨程途渺七千未敢與君中外叙予與君皆

家姊也忘形且自託齊年

登別峯菴望海忽值風雨

朝曦色染滄溟綠東望海門如半粟滄溟突處天蕩搖  
頃刻已見西來潮象山南頭蒜山尾一舸倒流還數里  
風威不敵潮勢狂吹角北岸停帆檣君不見日居萬瓦  
鱗鱗內眼暗頭低殊不耐此時懷抱覺暫開足底隱隱  
聞驚雷天公似把炎蒸洗東海叱龍龍盡起一眴江都  
電影來翠屏洲上紅三里

山中避暑聞同年曾都轉燠將報竄入都却寄一首

野客空山避暑遲正聞輶傳入都時西京鹽鐵何妨論  
南國鶯花盡入詩應有功名參計相竄憐風味似經師  
愛才一例尤難及報到平安杜牧之

地燈行

五月朔燈高懸不照地乃照天七月晦燈下墜不照天

乃照地燈高懸禮北壇土人云天燈為天地水府而設

常之民于其死日懸燈一月以報之託言天地水三官神也天地水府稱三官燈下

墜出東郭幽明教主轄萬族俗傳地藏為幽明教主天燈不接天

僅與星斗聯地燈不貼地都復單堦砌地燈數比天燈

多五里直接官塘河雜以梵唄兼笙歌千舫百舫燈前

過君不見天燈完地燈接更有水燈波上貼三燈看盡

無燈看秋半皓月升團圓

偶檢故書得三友人遺札各賦一首

通政司副使錢澧

早年重望出遐陬六詔人文第一流作史舊曾居柱下  
建言頻見伏螭頭鷹從鳩化心仍恕蓬自麻生節亦道

君與余同年葉舍人雯宦善嘗共寓居每以名節相勗我是庾公樓上客彈童傳

到亦生愁指甲辰年糾陝甘署督畢宮保一事

太子太保提督花連布提督死事尤烈其碑文余在翰林時所擬進也

與余同官貴州交契尤密生平本以志墓文見委故所撰碑文叙其死事頗詳蓋云

尺書肯為故人題已值倉皇盡命期生戴頭來知秀實

死餘膽在說姜維蠻荒屢共中宵讌絕徼曾褰大將旗

君先在金川著功八百里驂休更御送公天上去騎箕君有善馬嗜之

成癖

### 鳳山縣知縣贈雲騎尉湯大奎

廿年里巷憶同居廟食今看義烈俱君少時與余同居中河橋委巷中巷

口即隋陳司徒果仁祠額名英風義烈未到斷頭先墮指完憐歸骨尙銜

鬚書埋魚腹濤空沸餉轉羊腸道苦紆君年前曾解餉甘涼畢竟

酒人能報國君尤善飲霸陵醉尉亦捐軀時里中王麗可亦以佐雜殉節陝西

近築西圃將次落成偶賦八截句

堆甬竒氣漸銷磨山不嶙峋水不波只有露臺高百尺

偶然平視到羲娥

薙草澆花久乏人攤書聊剩此閒身不妨我少元章癖

滿架傾歆滿座塵

荷戈歸後鬢初絲未碍齋頭睡起遲忽夢天山萬年雪

一燈如豆酒醒時

轉憶童時奉母居三遷遺訓尙欵歎半間板屋孤兒占  
聊抵親存侍板輿

心事初冬鬢晚秋祇餘春夏氣仍留旁人莫笑閒居早  
五岳遊完住此樓

人說池亭入畫圖臨流時悼影形孤防他春到鳩鳴急  
巢好先無婦可呼

作達時時憶樂天尙嫌七十始歸田一丘一壑吾應足  
不更描摩池上篇

屈指平生志業虛勞勞蹤迹五旬餘東西豎亥行將徧  
纔得蝸牛一角居

蔣通判騏昌官興平縣日于土中得漢張騫印一方興

甲平古槐里也壬戌歲出以相示并屬作一篇以紀

西京世數傳至九文爲仁君武英后張騫鑿空縱萬里  
金印何嘗大如斗姓名惟剩玉一拳誰果好事爲流傳

玉方一寸白如雪或者采自黃河源當時開邊承意指  
堂邑氏奴同出使隨軍卽以勲得侯終是人間妄男子

功名雖竒意則妄地上行完歷天上惟應地下名不傳  
想欲攜之伴深葬騫經絕域我亦經祇少一棹天邊行

伊江傳有故侯碣伊犁傳有張騫石碣搜訪百日終沉  
冥四周雖完一角折世上誰能盡完璧漢家末葉益可

傷傳國璽猶輕一擲君不見廢丘千載剩荒丘故物摩  
挲說故侯國士一坏何處覓轉因槐里憶朱游朱雲槐里人墓

已無考

同里戈裕良世居東郭以種樹累石為業近為余營西

圃泉石饒有奇趣暇日出素筵索書回題三絕句贈

之

奇石胷中百萬堆時時出手見心裁錯疑未判鴻濛日

五嶽經君位置來

知道衰遲欲掩關為營泉石養清閑一峯出水離奇甚

此是仙人劫外山

三百年來兩軼羣山靈都復畏施斤張南垣與戈東郭

移盡天空片片雲

中秋夜坐

天上風初緊人間暑盡淡獨搖明月影頻訪市橋秋暗  
響蟲藏砌華燈燕出樓年年當此夜坐待曙光流

八月二十日抵甯國同年魯太守銓邀遊北樓并留飲

桂花樹下賦贈二首

自有茲樓復幾年爭傳何好問青天人言李白曾低首

我是洪厓許拍肩不覺玉盤遲出海何訪金粟早開筵

羣仙高會今三度

余與太守同年同門然把晤甚少惟  
己未歲太守調選入都會飲二次及

此而一榻仍容醉後眠  
三耳

汝穎東西頌宰官一麾出守又江干魚頭參政家聲古

鶴背仙人鬢影寒秋老菜羹先釀酒銜荒苜蓿罷堆盤

凌教授欲招飲以此而止升沉中外誰能記仍作龍華會上看

半月臺久坐

正值下弦候來登半月臺夢中雙屐遠足底萬扉開闕  
世餘喬木流光漬古苔他時闌楯葺太守欲修北樓及此臺應許

醉千回

席上喜晤施上舍晉賦贈

十年不遇施居士金粟花開偶來此白須居士金粟花  
我鬢亦與霜爭華主人開筵當日夕夕日暉暉照杯赤  
我傾一斗君百杯秋老頓覺春風回陵陽仙人作校官  
邀我苜蓿餐闌干我嫌苜蓿不救飢却向太守求甘肥  
山陰之尊飲不竭滿案溪菱問山栗仙人赤鯉膾作絲  
興發不顧琴高唾青松枝頭碧月來移酒欲上元暉臺

眼前百事不措意肘後花朵驚齊開山禽飛回水禽集

只覺樓高渺難及何時百尺爲貯梯

時北樓梯拆不得上

送我白

雲頭上立

琴溪客館作

拉拉雜雜彈琵琶蕭蕭瑟瑟開渚花青天沉沉忽無見

殘月黯黯生光華迢迢溪水何方瀉漠漠山窗已成夜

膠膠擾擾鷄一鳴雨點落落煙冥冥

曉度箬嶺

屏山高萬仞厚亦徑千尺空明初日照表裏恍不隔寧

知深谷底夜氣未收墨白鳥倚樹眠青蟲抱枝蝕林梢

開百里下嶺勢尤仄天都雖半露地脉已全坼平塗無



十步絕頂一關陘亭午日氣紅楓林亦齊赤

夜宿許村

許村凡五里路險容難到回厓視昏旦絕頂突夕照高  
低皆萬仞山石時露窳昏鴉無樹集占此社公廟原北  
色已暝原南赤如燒蹤疲思托宿地陷忽如窖明晨還  
屈指卅里路森峭夜半嚙語多擔夫時競道

與程吏部振甲話舊

精廬百里走難停依舊山排屐齒青老眼讀碑猶似月  
故人堆鬢已多星揮毫尙記參旁午君久值機廷鑿險今看  
邁五丁君尊甫虛谷先生修篁嶺南北道幾及百里至  
今行人德之君又續修府城中道八門皆徧却喜過庭詩禮在半傳家法半傳經

程君欵我于丹工精舍前後凡五日醉後率成二律卽

贈令子待詔洪溥

帶得天都夢來眠石室雲半庭花韵寂一谷草香薰李  
白金魚佩羊欣白練裙醉中揮墨嬾且與話離羣

山雲猶帶夢山溜已驚眠林果堆衾上秋蟲出枕邊宿  
醒吾尙病縱飲密疑仙問訊諸郎好溪茶手自煎

河西橋太白酒樓歌同汪孝廉燁及程待詔洪溥作  
春人不肯留春燕亦難駐秋風開簾帷微黃入山樹山  
葉欲落禽驚翔紅樓參差已夕陽一十年上事誰識樓

上有客傾千觴新安茶多苦無酒何似山陰剡溪走仙  
人遊戲無定方飛去飛來亦何有我疑黃山六六古未

開五字那不題元暉不然元暉去後公復來何以長句  
不賦空銜杯驚人句好公問天我轉欲問公從前惜哉  
仙人蹤跡不稍待祇見樓外山色黯黯谿水鳴濺濺公  
前祇有樓公後復有橋石橋千步樓百尺遠視城郭何  
迢迢白雲中間立少時適有遠札馳相思時得方明經  
如川札約遊  
巖同遊年少亦清絕瀟灑並若崔宗之君不見樓頭一  
派揚之水直下巖灘復難待故人憶我我憶公雲自歸  
山水歸海

烏聊山

女牆沿山百千級客到女牆皆却立城南暝色似拒人  
一片昏鴉噪樓集山頽五石皆隕星突處尙帶天光青

山僧煮茗餉山客五客一人蹲一石

山頭有落星  
石今裂爲五

太函山

離居幾日無情緒雁尙未來春燕去城頭乾鵲時一雙  
咒得蘆花白如絮太函山人晝掩關五客偶復遊茲山  
丹正南頭碧潭左一塔對窗如揖我

傍溪菴

西風泠泠響天關炊煙一城飛出山炊煙飛青水煙白  
襯得斜陽滿江赤新安古刹皆李唐此刹勢復凌層岡  
石厓中飛雲縷縷佛頂古苔堆寸許

環峯閣

雲光開處穿飛騎一嶺蓼花紅到地瓜花黃蔓復上天

石屋踈疎集秋氣屏風一曲隱一牀窗扇重疊穿朝陽  
芙蓉花生溪水死一半遊鱗鏡中紫

留別程吏部

茶香清後酒魂蘇更對奇峯引百壺明日兩重山外路  
夢君先欲夢天都

偶向新安踏市塵蕭然六合此闕身煉丹池畔揮千紙  
赤鯉先驚化墨鱗

贈沈教授成渭

我愛沈夫子平生見地超鬢踈秋後葉筆勁午前潮地  
僻成鷄市官閒類馬曹醉談先世事七十恍垂髫

贈莊司訓雋甲

我愛莊夫子中年薄宰官君大挑一等芙蓉開皖晚苜

稽笑闌干世事心知熟羣經口誦完俸錢餘數百先約

客晨餐

出郭望天都峯

三為歛嶺遊一詣天都頂天都頂上人今晨若居井蓮  
花何鬱鬱蓮葢何迢迢蓮峯雖絕竒未與天爭高我雖

憶天都天都不思我天風響空中青紅落雲朵昨登九  
子山正面天都峯瀾別三十年舉手揖半空芒屨久已

穿遊客亦俱蛻謂壬辰歲我憶天都峯無心返吳會

半道宿吳公壁

危途怯宵征百步亦千折我攀飛鳥巢忽見孤僧室同

齊亦驚喜天上一燈出寧知到天上石屋左右列酌我  
山腹泉心空水清澈重陽猶未屆霜露已成雪危梯延  
客卧膚凍慘欲裂濛濛衾枕膩嵐翠入窗密燒燈雖未  
燼辨色戒行疾山屋望始驚山禽挂枝歌

道中偶得二絕句卽寄洪溥并呈瑤田徵君

煉丹池北小方亭無數山光入幕青贏得閉門三日醉  
持螯左手不曾停

易田三禮爨齋史更有魚門五七言怪底郎君家學好

春華秋實萃篁墩

徵君及文學敦編  
修晉芳皆篁墩支

山中夜起

山空羣動息木葉已先凋衆響從何至天風與蕩搖砌

涼蟲語寂閣暗鼠聲竄夜半催人發新霜幕外飄霜降節在

重陽日時  
甫月初五

重陽日霜降

白衣方送酒青女正飛霜聊記重陽節今年在下洋

唐二軼華罷東流縣尉寓居皖口已二十年昨得問訊

書作此奉荅并勸歸里

唐本名鵬後以字行

昔年曾住屋西頭薄宦離家已卅秋彭蠡九江時北望  
廟溝一水尙南流

君舊居也

踏殘春草思前度數到晨星憶

舊遊正隴近聞荒翳甚待君歸更理柔楸

見落葉有感

年已迫遲暮無復少壯時落葉旣辭樹終難上故枝今

年故枝衰明歲新枝好亦如人代謝子老孫復抱明年  
春異今年春老人衰遲喜抱孫花開千回落千徧孫復  
抱孫吾不見

乘月行宣城道中

葉葉隨風逐去程半空殘月出殘更秋林紅到傷心處  
先有曙鴉啼數聲

李白西樓眺北樓南樓又占庾江州老夫才地雖然減  
也築危樓東海頭

登北樓作

世載時牽夢今辰眺覽真頽然五蒼柏都似六朝人徑  
有元暉月樓無庾亮塵更應招白也同醉小陽春

是日  
立冬

夜泊小南湖

小南湖畔路舟泊已初更四壁懸星影千灘出雁聲夢  
零前夜雨雲識詰朝晴魚鼓敲何急如從枕上鳴

溧陽道中

木橋分西南澗水四邊集人家臨澗好門外水聲急青  
山無半里朝爽近堪挹村翁無一事倚杖水邊立兒曹  
農事竟茅屋飭修葺翁鳥靜不譁深村啄餘粒

溧湖夜望

沿林風轉急紅葉裹歸僧隱隱青山隙迢迢露塔燈夜  
雲空際落殘魄望中升十月南湖涸魚龍氣尙蒸

題畫

留得春風自掩關三層閣上著書閒  
祇饒碧蘚無紅葉不使秋冬氣入山

蠡河感舊

挂席去無影夕陽空閉門  
重經昔時地頻斷昨宵魂  
檻折春禽占廊虛暗水吞  
尙餘煙柳在依約舊衫痕

乘月行攝山道中至朝陽門作

水雲村樹共彎環  
樹裏人家未啟關  
正是四更殘月好

騎驢行徧六朝山

南岡北阜界初分  
遠憶茅濛薜子文  
江左名山本無幾

讓他一帝一眞君

過徐中山王墓道有感

難從英辟共功名  
事過猶令野客驚  
彭越醢非三尺法

謂藍玉傳友德等

范增疽盡一杯羹  
中山病疽特賜鵝炙一鸞食之乃卒  
龍蟠帝

鬬形仍壯獎  
啄王孫兆已成  
猶幸開平得前死  
不然險

欲壞長城

送孫大星衍仍兵備山左

葛仙祠畔早披襟

在句容訂交

不信居然算景侵  
兩世逮君

皆皓首

君祖母年近百齡尊甫年已七十五君須髮盡白又數年矣

一生于我伴長

嗟知交出處  
關成數天地  
分明鑒寸心  
良史異時商合

傳莫教廊廟媿山林

采石重謁大白樓

枯僧驚爲起蓬關  
三十年前棹始還  
身後名輸一杯酒

眼中人隔幾重山前與孫大同遊今孫大尚留滯吳門夢留蔥嶺煙雲外  
月挂蛾眉杳靄間公謫夜郎余更遠得歸公亦代開顏  
然犀亭懷古

過江名士竟誰優到死猶爭第一流倘遇可兒先拔舌  
早逢英物一開眸孤亭正對天門峙百怪將從地府搜  
却憶登壇誓師日義旗幾欲特荊州

一事傷心說倚闌求忠于孝果非虛勤王縱使能投袂  
將母何因便絕裾休更火犀然穴鼠也應風樹泣臯魚  
留賓截髮兒能報羨殺陶家奉板輿

涇縣黃田訪朱吉士珩曰留宿培風閣卽席賦贈并寄

哲昆觀察理閩中

君家門前溪水足大石寬于百間屋到來三折山已深  
鎖徑一橋環碧玉四山蒼蒼合一澗澗水時聞不曾見  
青松點入紅葉灘時有水雲飛片片溪風蕭瑟溪雨涼  
鷗鷺直來問字堂縹緲堆架一何滿山鵲亦聽書聲忙  
樓頭讀書日幾回樓上客兩官蓬萊西園子弟盡才俊  
作賦險欲追郗枚一更月出斷崖口却對好山爲置酒  
醉向培風閣上眠窗疎不礙看星斗談深復憶神仙侶  
橐筆乍完仍叱馭溪山如此不歸來却復看山廈門去  
列岫軒久憩  
峯巒三面峻都抱讀書堂半夜吟聲苦層霄月影涼偶  
懸徐榻榻眞認鄭公鄉他日來相訪門前荷芰香

二十二日夜雨曉起見山頂皆白蓋天氣嚴寒山半以  
上均已作雪也喜而有作

飛雪不到地祇積高高峯高處亦不停旋轉西北風稜  
稜夜半風尤猛東嶺雪仍移北嶺樓頭一白直接天樓  
上客真同坐井清寒入骨難久留北風吹人下小樓衝  
寒簾下一杯酒酒色絕似清江流曉風初收晚鐘動山  
骨吟肩疊高聳圍爐倚酒欲作書飛白先驚人窗孔  
復憇松竹塢卽贈陳孝廉寶泉

松竹軒中說授經授經人已久知名詩傳一一鶴聲峭  
考比非非國語精墨鯉鏡中浮浪起蒼龍天半怒濤生  
闌干月上應無事更掃書堂門酒兵

莫愁湖久憇并謁徐中山王畫象

結綺臨春事久非湖北卽清涼山臨  
春綺綺舊址在焉隔坡樓殿尙依稀

到來海燕樓禪幄運去山龍暗袞衣空館尙餘調鶴地

眞王徒剩釣魚磯今湖尙屬中  
山子孫收稅惟應兒女英雄淚灑向

秋空作雨飛

感賦年來里中同歲者相繼物故近聞劉舍人召  
揚亦歿于山左亦同歲之一也感而賦此

流光到眼若飛塵零落知交倍愴神鄉曲苦無同歲友  
名場唾作過時人酬知事每失交臂傳世書仍欠等身  
只有壯遊聊自慰記經星海陟昆侖

偶書示友

習尙多年卽一更後生原不及先生好名亦是文人事



不近情人不近名

楊大令倫劉舍人召揚歸櫬尙未抵里復追悼一首

一作郎官一省曹五旬年命不堅牢管寧死後無龍尾

謝守生前有鳳毛君為劉文定少子學博可曾編說苑愁多先

已反離騷殘秋旅櫬仍難返望斷清江綠半篙

天王堂謠堂在城東太平興國寺

天王堂中屋不修兩脚總打天王頭耳中穴鼠雀啄眸

力士杵亦隨波流欲修天王堂泥閉天王目一臂天王

已先剝臂落金剛復傷足擡天王出募錢募錢踈挂天

王肩募錢縱多僧醉飽却任天王坐旁側

以長至日 太和殿早朝詩課院中諸生亦敬賦一

首

鷲瓦千行瑞雪消火城三面集金貂記曾采服趨 中

禁特荷 殊恩拜 內朝至日 皇上或不御殿

行禮惟值內廷諸臣準萬里烽煙清禹甸丙辰丁巳

采服拜乾清門塔下九天音樂奏虞韶觚棧回首真如夢獨向江村

聽麗譙

萬卷歸裝圖為孫大賦

每耻前人我不如年來妄念始消除笑君積習偏難盡

尙喜人間未見書

君正褰帷我荷戈買書錢已苦無多丹黃別有三千卷

或可釐君校本譌

月午樓歌

仙人好居樓樓築青山頭樓居又比山居好八牖居然  
拓天表山樓明月不待宵海上月出光先搖讀書聲高  
月亦高月午尙覺書聲飄前黃高峯後簪嶺書聲飄壓  
四山頂松梢夜半老雀醒雀唳亦比書聲清樓頭雀影  
兼人影樓外雲鋪百餘頃仙人世外無書看聽書日日  
來檐端月亦不得落書亦不得完君不見紅闌干前白  
玉盤讀倦且把明霞餐

受業崔辛化校字

更生齋詩卷第八

陽湖洪亮吉著

北郊種樹集

讀史六十四首

大九州藏小九州大瀛海外水仍流九州各有開天聖  
迭拄乾坤到盡頭

啾啾唧唧四邊鳴造字臺邊夜哭聲足見一篇無鬼論  
便從上古已難行

一粟先看世界浮女媧搏土不曾休自從未有人行日  
玉兔金烏已出頭

魯陽戈已嫌多事第一尤憎后羿弓正要不分昏與旦

懸他十日照寰中

棋家國手說秋儲此局開從允子朱破盡工夫究何用

笑他一著競贏輸

何須刻意別靈頑物物同生宇宙間各有出奇爭勝處

翼填東海擘開山

蠶食何堪四面來陽人負黍踵難回周家八百年天下

末路惟餘避債臺

曉饌牲牢夜擊鮮華堂養士各三千何如五百田橫客

蹈海都同魯仲連

督亢先看具地圖樊于期忽仰天呼燕齊海上多奇士

狗盜要難及狗屠

一椎一筑一匕首三客果誰能策勲滄海君來亦無用

先知獨讓瀉池君

開國先愁乏遠圖西都習尚逮東都漢家一代崇虛誕

黃石兵書赤伏符

緣知隆準是真龍白帝先愁試劍鋒功狗已烹高鳥盡

祇留一雉雖深宮

萬卷先從客舍儲撰成八覽紀乘除笑他只善居奇貨

也學虞卿強著書

漢家中葉慶連綿元狩元封國祚延天上歲星來執戟

如何天子不長年

前殿危言批逆鱗後宮思重亦忘身朱雲折檻熊攀檻

越顯名臣與美人

蘭茝招魂些續歌楚天萬里不生波願將魚腹詞人弔

文考湘江屈汨羅

宣元以後治優柔況復專朝有五侯正與商君法相反

虱官不去鼠姦留

客未登車主候門世家法已無存史臣倘爲宣尼諱

十四傳中削此孫

烈士傷心古道旁一生曾未值孫陽却看老驥還千里

正負鹽車上太行

法堯禪舜亦家風二十韶年作上公不見露臺曾惜費

偏能全賜蜀山銅

著書空費萬黃金剽竊根源尙可尋呂覽淮南盡如此

兩家賓客太欺心

並世才能識魏公死猶兩女嫁英雄炙雞斗酒無多費

我欲時時酌冢中

大將王常太尉牟嵩夫游徼盡通侯東京人物寥寥甚

卓茂居然冠輦流

同時北海出儒宗邴管仍堪合作龍畢竟漢朝經學貴

黃巾爭拜鄭司農

祖尙元虛自晉賢黃初人物已開先漢家盛日尊黃老

不習南華內外篇

霸業王基並有因轉嫌封拜不酬勲虞侯賜劍燕王刎

恐負難兄付託殷

謂孫大帝宋太宗

東京文格本來卑一字無慚語亦欺不被古人瞞到底

曹娥碑與郭君碑

多金贖女出匈奴友誼曹瞞絕世無愧煞君家五官將

刀頭難赦仲宣孤

聖證篇成漢學亡六書訓詁孰推詳一編難與專門較

杜預春秋寤穀梁

家世何應出阿戎嗜錢鑽核作門風葫蘆塵尾皆長柄

莫晒南朝王侍中

絃歌小邑甯風流一令寧輪督八州強使名賢附華胄

泉明地下亦包羞

江東王氣總綿延晉宋梁陳代屢遷只有蔣山惟一帝  
居然香火占千年

白雀空矜一世才新支堡下忽徘徊死胡尙嚙生天子  
何怪堅頭入夢來

漁人何事舌偏饒歷數炎精迄本朝從此桃源不淳古  
并知劉石與苻姚

虛無上八洞真僊稗史新傳委宛編不信堯時白蝙蝠  
能知混沌與開天

已見苻堅過項城八公霍暎與風聲淮南雞犬都仙去  
尙剩沿山草木兵

妄思成佛反遭魔歷劫應知負債多何必贖身同泰寺

累他臨歿喚荷荷

武都山接谷軒轅百頃仇池富水源不是氐羌來據險  
人間此亦種桃園

蕭曹丙魏冠西京房杜淪亡姚宋生只有漢唐人物好

中興開國盡名卿

三峯高接華山巔下視蒼茫幾點煙不是謫仙人在世  
好詩誰敢問青天

胡雛相異兆生時鐵額銅頭并護持得豬婆龍死命  
僅須一箇李豬兒

中唐風節數韓公詎止文章一代雄異類強藩盡低首

王庭湊與鱗魚同

總是滄來劫裏來唐除丑口呂書回何應一落金門第

不作仙人即盜魁

萬羊太尉李文饒食料誰知命所招日啖半升原作相  
何需八百石胡椒

轉覺雙鬢有定評旗亭聲價一時傾怪他九級慈恩塔

徧檢都無李杜名

絕代才人韓致光百篇詩句一奩香虎須拚罷吟么鳳  
鐵是心肝錦作腸

迹怪稽神作語林誰知劫數已相尋冠貂衣紫人如豆

徒下南朝徐楚金

年名五代不多時七姓官家盡健兒辛苦九朝長樂老

朝秦暮楚費支持

魯論半部篋中藏垂老應知亦健忘怪底一朝多語錄  
用他學究佐興王

香孩兒事寃堪疑滅迹思將一代欺身上黃袍袖中稿  
製成恐不是臨期

百事都嫌強出頭扶乩壇上亦來遊神仙何苦名心重  
處處題詩向酒樓

詩案曾留御史臺儼人亦轉歎奇才雄文却要蛟龍助  
不枉先生過海來

尚書別有古文傳西蜀才人著太乎僭聖亦同非聖例  
楊雄悔蹟趙師淵今所傳通鑑綱目實朱子門人趙師淵所作揚以太字擬易趙以綱目擬

春秋與梅賾換爲古交尚書其罪一也

一成一旅總堪憑萬頃洪濤一葉凌不據西湖據東海  
趙家端可號中興

儒林道學本同原分傳翻嫌史例繁只我欲書三獨行  
石工軍校鄭監門石工安民殿前軍校施全監安上門鄭俠

萬乘曾爲孤注來惹他譏口一時開契丹西夏非強敵  
祇覺中原乏將才

七尺終當死報君黃冠南下屬傳聞一編琬盪名臣錄  
都讓王家生祭文

戴人主思如戴昊天投荒百日準歸田家風尙愧郗  
陽集雪窖冰天十五年

詩情畫筆號專門三絕雖兼格不尊說到彥回先齒冷  
更誰人數趙王孫  
讀史常侵夜漏餘時時一夢到華胥可知不在青天外  
竟欲乘風去卜居  
都似空中飛鳥過強分名目費編摩試將列傳平心看  
一代傳人本不多  
千日中山醞已嘗便須一鋪冢中藏伯倫死酒非真死  
想要逃名入醉鄉  
飲啄何須更好名修真先要近人情烹龍魚鳳瑤池讌  
誰說仙家不殺生  
晉代旌陽唐李筌是誰人已得真詮近來老輩神仙少

數到元時白玉蟾

寓興

一身從何來父母之所畀既須建修名亦以綿世繫受  
全歸亦全所係實非細曹然魂魄化仍與親附麗一一  
返厥原同歸天與地形骸既速化齒骨朽亦易留貽世  
間者不滅惟此氣

古人善讀書書亦本來少經年可卒業不必徹昏曉沉  
酣六經外秘籍偶探討方書亦無幾素問及本草百二  
十國書一名作寶少纔能肆力多卽難見巧陳編逮  
今日富至不勝考所以無用書空資蠹魚飽

天地雖至大物力本不多惟茲樽節心爲能養天和日



食數萬錢遠聞王與何飛走不得逃高下設網羅曾誇  
鼈重裙兼詔四足鵝風俗近益奢背峯炙明駝俊味罔  
不登揆及燕雀窠末流心竊憂詎敢揚厥波非有求福  
心又豈懼譴訶甘受鄙吝名不敢知其佗  
學術本一途後乃判釋道魏叔寬無識作史列三教三  
教中復分十百富名號爭奇仍門捷一一欲建效遂令  
清淨域無事亦爭剽民生半無業物力因已耗合一縱  
甚難何不各守要兼叔更非計分路或同到惟求心所  
安誓不惑果報

新進喜事人不可位相將持其一偏見違復計得褻紛  
然變成法畢竟無一當古來大聖人貴述不貴創周官  
不善讀邪說復首唱青苗市易行天地爲播盪巴東亦  
不免時露好事狀偉哉無口瓢此乃眞宰相

側聞飛仙人上者居列洞騎龍跨鳳外頑石亦能控游  
行一世間風伯自迎送怡神雖足樂于世究無用況經  
年五百劫數亦殊重我意不謂然隄廢復時弄空言如  
有神後世亦諷誦無爲守丹竈寧可抱酒瓮化人王無  
功日昨屢入夢況冥雖已久顏色益飛動醉鄉苦無書  
爲寫酒德頌

家儲萬黃金或者有憂色行乞得數錢陶然樂斯夕賤  
者未必非貴者未必得置身豐歉外庶不爲物役鍾乳  
一千兩胡椒八百石縱如彭祖壽亦恐難畢食徒然使

後來笑聲千載劇

少歲盛意氣不願爲詞人垂老筋骨衰勤力始作文投  
荒昨歸田松菊僅有存親亾逮卅年兼復鮮弟昆偕老  
願亦違骨肉滿墓門尙幸一室中不乏子與孫又客偶  
一歸旨酒又已温僕婢立我前勸我盡一樽慰勞固多  
方嘖笑恐未眞欲營山水區庶畢勞瘁身持此一寸心  
不死期報恩

北轅窮大宛西轡踰棧閣洪河狎蛟蜃滄溟截鯨鱈回  
思至危境亦卽寓至樂豈惟豁雙眸宵次亦已拓丈夫  
處閭巷百事苦束縛終年心賞處僅止一邱壑低瞻慙  
赤鯉高視愧元鶴寧知轆轤屨天外亦飛落平生無別

嗜有景必搜索生當恣游覽死卽安冥漠一世誰寬愚  
南山石成櫛

束髮事結交良友堪悉數文章與談讌各有投合處立  
身復不同分道各馳騖揚雄性沉默逸秀欣世務君看  
華與管始合分末路彼此不必非邪正性所賦卽如同  
學者意見亦參互王何標理解張趙崇傳注璣稱善名  
物曜乃詳訓話一得皆可傳無須學跬步君看天上星  
東西各分布飛何必陞走赤亦難誦素絕交論亦褊故  
者無失故

學術尙周孔治術尙黃老漢家西京前異說不得擾官  
皆核名實學亦具師表黃初尙元言配老乃以莊治術

日以頽沿流益荒唐明道崇理學升孟以配孔專門學  
益希語錄衍千種寥寥一千年感此風教殊實政罕逮  
民私心競師儒誰祀周元公誰讀軒轅書

獨遊水西登煙雨亭久憇追悼朱學士筠江太守恂辰

四月曾  
同遊此

山城一水環如帶雙塔影飛七里外行人望塔路不迷  
斜日已過山城西別來江水依然綠竹樹千尋路千曲  
林梢盡處立一亭日氣轉赤煙光青亭危一角驚先拆  
使我傷今復懷昔春燕巢空春草枯憑誰更問春消息  
當時逸氣橫九垓桃李迎客爭先開寧知過眼若飛電  
三客坐處生莓苔卅年舊事愁難再何況風光隔千載

龍徙空山杳莫尋崔歸華表寧能待芒鞋已倦蒲帆舉  
別意惟同夜烏語行客多時怨水風危亭入夢仍煙雨  
過水西渡

已作如塵似夢看殘春借此一停鞍能迎三十年前客  
只有參天竹萬竿

青弋江舟行

順流轉比逆水難北風吹水欲上山風中歸鳥性偏急  
逆浪逆風穿樹入青山影外溪流足溪水亦輸江水綠  
水西明月來水東却單一角斜陽紅

夜起

窗櫺高下綠低迷夜半何人發水西留得月痕剛一線

却教山鵲盡情啼  
長至後一日消寒第一集諸及門餞余洋川書院之生  
水雲閣分賦得山樓卽事四首

前宵雨初停濕霧一山皺白鳥入白雲延回飛不透  
樓閣三百家溪流白環繞澗底出笙歌年豐賽神早  
却倚青松樹迤東築小樓昨宵驚驟冷靈鵲宿牀頭  
紅林千百株一夕已無影山風颯然來巢禽各延頸

蕪湖喜晤張太守祥雲

時攝道事

暫移五馬駐雄關意外相逢遞往還同輩漸如秋後葉  
異書高比屋頭山人傳海上魚龍橫時洋匪在寶山嘉定一帶滋事我  
共江干鷗鷺閒澗別十年重握手喜君青鬢不曾班

荅友人贈梅

一棹欲歸江浦五株誰贈溪梅却掃軟紅塵去安排萼  
綠華來

港口小泊

濛濛雨細天垂黑白鷺欲將行客嚇眼前風浪轉不驚  
飛鳥蹈空人蹶蹶

消寒第二集陳孝廉蕊本招遊蕪湖城東沿後湖隄至

三昧菴看黃梅作

後湖三百頃煙霧忽微茫寺作前山界隄眞夾水塘瓜

分留寓縣

東晉時改蕪湖立襄垣定陵遠迺三橋縣

果熟薦空王坐久還成

雨黃梅發古香

十五日晚自東梁山移舟至西梁山泊晨起阻雨

東梁山上雲欲作西梁雪移此江南舟過江看落日江  
千三尺霧又向江南結三更迎面雨隱此當頭月已有  
鶻鵲聲愁霖苦難堪

守風西梁山竟日

雲從西走東頃刻一山出回瞻東梁山復向雲表沒寧  
惟南下少北去帆亦絕檣烏與林鶻對語較清切荒庵  
懸陟岸正晝色如漆我倦亦枕書陶然醉終日

舟過蕪湖始聞彭尙書元瑞之訃謹輓一首

不求立異不從同十載追隨朶殿東編集會昌名一品

蓋棺光政贈三公沒後奉諭旨仍贈協辦大學士升沉總在雲霄上

公自副相降補閣學復擢侍郎尙書皆直南書房思怨都銷氣燄中寬惜石渠

天祿署更誰博物比司空公聞見氣博尤悉本朝掌故一時無兩

十七日晨起北風尙勁書此遣悶

昨宵雨如煙冷晨雨如霧多謝西梁山留人三日住咫尺  
不見娥眉開山溜隱隱喧驚雷明朝未敢望江浦祇  
願征帆泊牛渚

是日晚抵采石因獨遊三元洞作

西來長江一萬里盡向石竇光中收回頭滄海亦不遠

初日欲上湖驚流孤僧聽慣亦不訝枕上長江六時卸

長明燈燼已十年空水光中不知夜

夜起登太白樓

準擬宵深秉燭遊然犀亭下泊扁舟青天無月人無酒  
辜負三更太白樓

十八日早自采石挂帆將抵江寧訪孫大星衍先寄一

篇卽以志別

時將赴山  
東監司任

今晨挂席思凌空五色已曜帆橋東舵樓繙書未一卷  
席帽亂捲三山風新晴水面鋪朝旭影外波濤尙如斛  
艱危歷盡心已平水狎龍鼉岸麋鹿此時却憶單居使  
可已乘流向揚子白髮樽前有底忙素心海內無踰此  
河流雖濁官能清河隄使者憎好名得閒篆仿徐內史  
好古客呼劉石經功名試問誰能足仕宦我知貧窶樂  
他時青兗來看山北抵二嶗東岱嶽

十九口早過烈山作

烏江浦口暫徘徊昨日舟從采石開半瞻柁樓眠未穩  
六朝山已上帆來

十一月二十一日消寒第三集胡戶部穆昆仲邀同孫

兵脩星衍冒雨至小倉山房探梅并留飲小眠齋卽

席賦呈並贈袁公子遲

會見郎君入抱時傳經近復課佳兒古梅似向閨人揖  
舊事都應老雀知墩割一隅

表大令校卽  
葬山房側

埋謝傅錦留

五色付丘遲談深紅燭全銷焰門外三更雨若絲

十二月二日消寒第四集李兵脩廷敬招同人集平遠

山房觀宋四家墨蹟卽席同賦

裝成橘頰荔枝詩尙憶煙雲過眼時

余久客畢宮保署見所藏宋四家至

二十餘種尤奇者藕文忠橋頌蔡端明荔枝詩也

一代傳人原磊落百年真氣

藉扶持寒梅消息遲霜信殘臘心情付酒卮我是庾公

樓上客摩挲故物劇相思

題秦宮人曉粧圖

仙雲如綺復如羅天上新看鏡午磨錯認廣寒宮小集

一輪圓月一恒娥

李兵脩以會勘江浙地界泛海至羊山信宿公事畢繪

泛海圖屬題率成長句以正

一帆出海何飄然五百甲卒藏戈船帆檣解與潮勢鬥

五色幢上蛟龍纏竿梢時浮復時沒蜃氣回環一山出

海風吹人若步虛却及島中方履實誰言海外一事無

文案積若牛署粗經時履勘事甫竣瞰海絕壁如浮圖

故人尙有洪厓在挂席何應不相待請公別買一葉舟

我亦時來看東海

初四日消寒第五集李明經筠嘉招同李兵脩廷敬何

徵君琪陸孝廉繼輅林鎬儲桂榮楮華李學璜鮑熙

改琦徐棠諸文學並鐵舟上人吾園小集時余以明

日旋里諸公皆卽席賦詩相餞醉後率荅一篇卽以

留別

一崔引一客閑步汀西頭汀西閣上人一一如眠鷗元

裳丹頂時窺牖墊崔居然戀紅袖有時合隊出探梅七

尺亭亭影俱瘦，簾前新月輝。簾外疎梅開，春人結束登春臺。鼓吹復從門外來，主人約客排宵讌。落日暉暉坐中見，陸郎年少飲亦豪。十七人中稱完健，香巖儲高詠竹圃鮑歌。激得閣外生回波，就中匿笑何春渚。七十風懷尚能補坐中有歌者四人，解衣作畫改七鄰。我亦石上題牋忙，鐵舟開士詩才逸。畫筆年來亦如鐵，謫仙開衙東海頭。好客絕似劉荆州，穀人詞老梅村叟。前後可稱雙祭酒，時逢吳祭酒錫微嫌病酒及十旬。明歲花開可來否，一更飛觴至二更。坐上客始連翩行，冥濛歸路不知數。幸有導騎持燈迎，君不見新知雜故知。卜晝又卜夜三更未醒船，已行挂席當從蠡河卸。

鐵舟上人邀至南園早飯

晨餐未了午雞啼，好客應知劇孟齊。上人坐上一味孤

行竄相稱公參玉版我黃壘

舟過昆山有感徐司寇乾學王司農鴻緒舊事率賦二

絕句

傳是樓空水榭荒，百年先已感滄桑。早知身後名皆在

何必師生軋百場

司寇奉命所修一統志及司農明史稿皆係可傳之書

人言太僕繼南豐，微覺前賢面目同。我讀亭林居士集

不求工處自能工

初七日消寒第六集瞿應謙別駕攜酒招遊虎丘久憇生公石時宿霧漫山飲畢不見一人悵然而返分賦



得石字

山僧啟山關驚出雙逸翻寧知攜榼者先已候門隙僧  
寮雖未啟已布行客席樓臺丹碧影裏此寒霧白三載  
偶一來為歡感今昔兼攜亡友句時適攜亡友遂寧  
張問簪詩為閱定久  
慙生公石同儕攫世事一瞬闕不得時待諸同  
人並不至千人石  
上苔寥寥坐雙客

臘八日破曉過錫山作

山雨接天白破寒溪上來北風吹別袂南酒勸銜杯宿  
鳥依林顛驚魚蹴浪回呼僮泛膏粥聊賞膽瓶梅  
先壠側形家言尙有昭穆二穴因以昭穴葬亡婦而舍  
弟冢適被水漂遂遷葬于穆穴自此先壠已無隙地

他日子姓不得更附葬并作此詩以為戒約暇日復  
課兒子等添種松百本本作籬衛之庶幾封殖之義云  
爾

憶從葬西原子姓殊不少一輩課十株佳柯已繚繞冬  
青女貞樹墳道藉以表東南離百步溝水成曲沼春到  
上冢船粼粼碧波小經營三十載齒髮慙已老無貽地  
下羞吾行倘堪保

十步依我祖五步依吾親料量松栢株芟此荆與藜石  
几清且修藉以列俎尊吾弟近亦遷庶免水嚙墳弟冢  
為水  
嚙墓門爰遷柩穆穴全家骨肉多鬱鬱滿墓門統計一室中誰亡  
復誰存恒榦有自來吾以還二人

逐臣西戍日十冢  
渾河源回頭蔥嶺高  
萬仞瞰北原豈知  
螻蟻微竟荷天地全  
荷戈復歸來衣敝履  
亦穿得耐先壠旁  
此事豈偶然願既遂  
首邱萬念盡可捐  
所慙德未酬以勗子  
與孫

憶昔初結禱白雲  
溪畔室追隨三十載  
亦旣衣衾弗一朝  
人事改丹旄崖頭設  
明明同命者今日乃  
獨活忍心奚若此  
委彼在林樾翁始歲  
時饋地下冀修潔却  
待松有濤吾行亦歸  
骨

十七日消寒第七集  
楊上舍槐招同趙兵  
備翼莊宮允通敏劉  
宮贊種之金太守聚  
方明府寶昌早飯石  
竹山房復至秦園茶  
話始別分體得五古  
一首

春筍未及抽石竹已成  
列草堂花氣暖無異  
讌春日主人工治饌  
厨婢亦修潔溪魚及  
園韭日昨已梳剔樽  
羅會稽釀盤滿洞庭  
橘寧惟充口腹志意  
亦怡悅尤欣嘉會早  
讌罷日方晷復有縮  
地方秦園茗堪墮

宅北有茶亭仿錫山

秦園  
爲名

更生齋獨坐

更生齋獨坐俗客無  
一到圖書堆滿案藉  
以拓衣抱主人五十八  
始覺有白須蓋棺無  
幾時所幸樂有餘前  
時葬山妻日昨哭叵  
友平茲萬古愁庶藉  
一杯酒林梅旣寒香  
水仙亦幽姿呼兒開  
甕頭屈指當祭詩

讀歸方伯景照猶女佩  
珊詩冊率跋一首時  
聞方伯已

從戍所旋里卽以寄之

每羽嬌兒筆陣道憶借臣牀戍西郵李騰空仙不旋踵

段秀實歸仍戴頭種樹經曾攜萬里方伯在塞外時簪菊種至數百

花格已定千秋東山絲竹真堪慰各有深閨侍唱酬

過白土鎮

右縣華陽驛前朝白土鄉剩坡餘臘雪微雨出朝陽月

向螭頭墮人從驢背忙盤殮思往事乙未冬過此本鎮戍才紀開旭以盤

殮斗酒 頻問讀書堂

青元觀

仙人高臥處觀後卽崑仙翁大家一巷亂雲飛列闕真如峙蒼松

相與依鵲靈朝語警雀古道身肥法侶來迎客仍穿禮

斗衣

重至句容展亡友王廣文吉士殯率賦一篇卽呈令兄

司馬周南理問斗南

卅年不到華陽岡南栢栢都已蒼縣中老友誰更健

腹痛寃憶西頭王與令兄周南分居東西宅當時賓從頻來往修竹

山房及西舫漫士心情沈隱侯校官風度王元長騎驢

已倦牽車來醉客何止三千回澹香吟屋賦詩處采筆

一一埋青苔朱茂才鏞及令姪潞暨駱秀才王奇均已下世孫郎遠宦鴻河口

我亦荷戈天外走前時白袷諸少年相對各驚成老醜

青元館前訪葛仙更向鳥翅岡頭眠三峯遠復有前約

時將遊 道士待客排雙筵城南欲別頻回首復挈城西

草莽酒一杯酌爾應快心生友竟堪成死友

臘月十九日消寒第八集王司馬周南招宋學博保暨

令弟理問斗南文學簡可陪遊獨窈山莊看梅歸飲

修竹精舍卽席賦贈分韵得莊字

三十年來事渺茫塢中藤蔓屋頭乘何期句曲羣仙會

重醉先生獨窈莊天上黃人會捧日

時話西清舊事

月邊青女

自飛霜遲眠緩步消餘酒嗅盡寒梅樹樹香

二十一日自句容沿破岡瀆抵綠野村裴主政暢招同

楊文學鳳翔暨小阮中翰錡上舍鍼集金粟山房作

消寒第九集并約明日同遊茅山卽席分體得長短

句一首

我飲秦淮水欲覓秦淮源荒岡百折走不盡側耳已聽

流聲喧未遵赤山湖先逢破岡瀆古澗寒流三尺足其

上莓苔葢深綠關心七日卽小除爆竹響已盈衝途年

殘只我無一事尙向山腹搜竒書道人相貽綠玉筇一

笑欲上高高峯寧知遊興昨方發大茅山頂雲先紅招

邀伴侶皆踈散祀竈黃羊亦充饌饋歲人貽赤鯉魚經

時我啖青精飯主人頻開綠椹堂更約入夜傾千觴一

門羣從悉來謁問我何事投遐荒遐荒萬古風沙集我

感君恩仍雨泣不是天邊早賜環何能地上

周遊屐陶貞白葛仙翁拍手空際欣相逢神仙大半遊

世上宰相亦復居山中清涼境地真殊絕一樹寒梅一

曉雪我向梅花樹下眠羅帷夜半飛明月  
遊裴氏園亭

深澗遊魚五色小樓乾鵲千聲寒日欲斜松阜亂雲已

暗山城

破岡瀆夾岸皆栽桃裴明經鍼于此送別更約花時復

遊因作此贈之

破岡瀆後亂山多結屋欣看傍澗阿此是碧桃花世界

不妨開日更經過

入茅山自黃仙墓至乾元觀宿

死非死生非生黃仙蛻處還留瑩出不出處不處宰相

居山究何補平生不解陶華陽念念都欲縈君王惟餘

一事差快意愛聽千尺松聲涼宦途不礙神仙境句漏

旌陽兩仙令但使能修駐景方周妻何肉都非病我來

依茅岡咫尺鄰荒墳山風蕭瑟溪水溫夜半白狼來叩

門

山北尋老君垂雲諸洞

半月西已墮半月東復升團團滿月光莓苔結三層一

洞嵌碧月一洞垂紫雲紫雲欲下倏復上離地驚看不

盈丈高低元氣若吐吞一朶突出驚當門其餘一朶復

一朶忽若雕盤貯新果朶雲盡處叩石鐘復有雷鼓聲

隆隆君不見壘中飛雲亦已奇此洞何止雲能飛洞中

英英鋪不足却惹生雲夜來宿

乾元觀夜起乘殘月看梅

萬夢初醒處回廊歷幾周好花紅蝶背新露白鳥頭徑  
轉風千尺簾斜月一鉤是誰喧客耳春水竹中流

宿乾元觀有懷孫兵脩星衍

百轉千回歷轡岡跨驢前事渺難忘曾攜天上神仙侶  
來憇山中宰相堂今日故人分出處更憐餘子半存亡

乙未冬同遊者兵備外爲林公子  
崇緝與及門鄭聯華今均已下世  
以陶貞白爲蓬萊  
都水監故及之蓬萊海水都清淺

道書

張太守鳳枝謫戍伊犁以愛姬冉寄其姊榮陽令署華  
太君處越歲太守札致太君偶不及姬姬本思憶成  
病復因是銜恨遂雉經卒太守自戍所還傷之屬賦

此詩

繁臺幾化望夫山却待征人久未還情到死生何以報  
揮殘老淚入陽關

七千里外別銷魂姬貴州人十五年前誓尙存郎不薄情儂

薄命再生端欲入空門

地府永埋千載恨天山不寄一行書傷心三尺生綃影

入夢多時尙未除

索嶺盤江歎遠官相隨幾見月團圓定情金縷裙猶在

摺向空箱不忍看

東坡南海公西海算雨朝雲夢總空寂莫小桃墳上樹

異花猶染淚珠紅

魂小仍隨油壁回憶郎門向裏河開築他燕子樓千尺  
供養平生畫像來

瞥見驚鴻影未真

在貴陽日太守曾喚姬出拜

青綾步幃動遊塵多

應平視劉公幹罰作新詩悼洛神

尙有西臺讞案存誓心終不出侯門九原若遇河陽令

謂陳大令熙藩時亦久卒

更欲低頭拜昔恩

小除日更生齋招諸同人祭詩

年殘風雪寒良朋悉盡歸如何未入春石砌已墮梅東

西比鄰中雅有數子才招來更生齋相與銜深杯諸君

盡華年感我算景催送客復入門晴陽尙暉暉

趙司馬懷玉自山左奔喪歸同官贈以一舟至清江浦

渡河膠敗舟圻八口幾至覆沒以救得免司馬作厄

解自嘲并索余一詩記事

大舟峩峩高百尺敗久無人肯相索先生途窮欣得之

輦致妻孥及書策忙中渡天妃聞意外忽趨河伯宅

無端突起尺一波竟敢馮陵四千石

兼攝本郡

馮生詎欲謁

陽侯展氏不關多隱隱艙無阿堵物堪羨舟有辛餘靡

亦圻郎君幸免魚頭戴如願本從龍窟得篙工舵手聲

齊奮撒網持鉤拯亦亟微軀險欲爲人鮓定例并須援

嫂溺孤兒一日三番哭水厄仍兼絕糧厄推量其故亦

可曉至寶隨身遭迫逼龍神要看瀧岡碑鮫府思撥辟

雍刻不然畫寶吳道元或者字藏黃魯直遭風濕米考

竟升落水蘭亭價誰敵評書既貴屋漏痕佞佛本當衣  
壞色但令釜底不生魚何必篋中長貯帛罷官尙飲八  
闌水助葬誰貽一船麥可憐剩有朝衫綠亦復染成天  
水碧窮經先已集坎塤讀禮還遲十窻窻曝日神方時  
僵僕見星歸路難匍匐髮膚未毀真天幸妻子得全容  
衆力王楊廬駱半遭此君曾刊唐四傑集才大例須沉澤國先  
生盛名亦不減一死何妨塞其責卽令萬一免沉淪從  
此尤應斷縑墨如何更不思愆咎更準解嘲成解脫君  
毋更以性命戲勢必重遭神鬼劾一官青社旣偃蹇三  
載聖廬須簡默仍愁溺後陸士龍照見麻衣笑聲劇

受業曹景先校字

更生齋詩餘卷一

陽湖洪亮吉著

冰天雪窖詞

主人少喜填詞壯歲後恐妨學輟不復作卽偶一  
爲之終歲不過一二首歲戊午自京邸乞假回車  
箱無事輒填至數十闕及自塞外回里亦時時作  
之遂滿一卷名曰冰天雪窖從其後言之也少日  
所作亦不忍棄并裁作一卷附焉機聲燈影詞是  
矣

臨江仙

綠鬢學仙愁已晚卽今況復蒼顏天空鳥去不曾還未



知雙蠟屐再入幾名山 半世著書難得了硯臺肯放  
清閒酒人相約掩蓬關臉從花索笑心與石爭頑

憶王孫

涼風吹綻一天星約伴時時過水亭說鬼宵深不可聽  
掩疎屏小婢齊聲唄佛經  
過汀故說愛新涼躲過前頭姊妹行私語喃喃已不妨  
卻提防移得鸚哥出畫廊  
兩重門內忽相逢一串花香出袖濃剛賭秋千氣力慵  
且從容眼角回青頰轉紅  
傷春長自下簾鉤杏葉扶疎柳葉柔三月花前雨不休  
沒來由私語催人上小樓

滿江紅

陳其年先生填詞圖爲伯恭學士賦

卅載填詞香一瓣敬酬陽羨可可是家山百里畫中頻  
見前曾見先生四十畫像涉筆偶描秋士影關情別有春風面笑

青衫五十尚沉淪工排遣 將擲笛先施羈乍展卷仍  
安硯仗卿卿壓盡等閒釵鈿別夜寂憐天似水當頭吹  
落雲成片算個儂風味有誰窺梁間燕

試問 熙朝人物在宋元之右只已未宏詞一榜尤稱  
淵藪前輩愛才眞似命昇平樂事吾能究趁閒來歌板  
兩三聲消清晝 竹垞老梅村叟招玉叔攜紅友且不  
知秦七何論黃九翡翠几暫停三寸管新腔已落千人口  
羨當年風月最清華誰能又

雙調江城子

紅豆詞爲禮親王世子作

深秋門巷動涼颼，掩闌遲雨如絲，折得一枝紅豆立多時。天上亦添新別恨，人不見，渺相思。拈來枝葉影參差，意誰知。酒難辭，且與梁園賓客，譜離詞。只有文園消渴甚，賦不到，九秋枝。

十六字令

初冬

風一夜千林葉墮空，開軒望斜月，正中峯。

減字木蘭花

香濃月淡幾朶露，蘭光欲泛，行過房櫺。福橘栽燈墮，小紅茶甌清冽，留得那年元夜。雪說夢聲低，偏惹簾前鸚鵡疑。

唐多令

眞氣本無前，豪情忽欲顛。一百番沉醉，酣眠亂摘九天星，與斗權當作酒家錢。寥廓約頑仙，踏紅雲種田待秋成。歲月三千擬釣六鰲滄海去，雖不飽，且烹鮮。

眼兒嬌

杏花樓上杏花香，無語斷人腸。干他甚事，鶯鶯燕燕，咒盡年光。依然簾幕依然鏡，依舊隱斜陽。如今再要當時人面，卻費商量。

又

嵌心百事總難忘，閒處一端詳。鮑姑紈扇，柳嬈羅襪，謝姊練囊。愁多不合住江鄉，夢少也千場。笙歌元夕鶯

花上已簫鼓端陽

轉應曲

雷鼓雷鼓打過春三四五還虧列闕豐隆催得前村挂

龍龍挂龍挂一幅水鄉圖畫

蝶戀花

時欲乞假南回書示子弟

十二闌干紅半曲桃杏將開一雨先舒萼多分散人眞  
有福半春好夢無重複 卅里迢迢煙艸綠欲望江南  
遠樹偏遮日好水好山生計足汝曹莫恨歸期促

賣花聲

春分

艸綠未成茵柳線難勻等閑鶯語幾曾聞只讓杏花同  
燕子占盡春分 心切望朝暾霧暗連晨關心西北有

征塵日日玉堂天上坐卻是閒人

謁金門

誰決策除是劉琨祖逖一事差堪贏越石承平非狎客

叉手巡行冷夕放眼追思疇昔好友綠儒都入墨寥

寥心孰白

相見歡

黃昏獨下珠簾病懨懨差喜蒼頭常苦夢常甜香三义  
渡三生路白雲尖惆悵長林斜月影纖纖

鳳棲梧

畢竟春來饒氣勢萬鳥啼春萬夢隨春至惹得玉梅添  
意智花開又豈干春事白袷春衫聞已製輕暖輕寒

春轉無倫次何是與秋非  
致春人只把情懷試  
神寒

滿江紅 譚子受英雄兒女圖

大纛高牙問此是誰家  
年少只亘亘倚天長  
劍勢將離  
翰千里偶追流電影  
萬金顧買傾城笑  
算渠儂二十五  
年前堪同調  
且緩緩金樽倒  
更艸艸離愁攪  
看車前  
努目急思投効兒  
女情懷何者是  
丈夫志業誰能料  
問卿卿何日定  
天山紅旗報

菩薩蠻

玉皇宮殿高無極  
東西龍虎更番直  
天上事偏多  
仙人鬢亦皤  
麻姑空一笑  
偶自舒長爪  
掐破碧桃花  
花光照萬家

減蘭

寄舍弟

吾家阿弟先我一年辭  
帝里玉版銀鱗飽  
啖江南二月春  
小桃開落穩坐卷  
施東畔閣應念  
衰翁騎馬朝

朝冒朔風

應天長

直廬卽事

構巢招得雙鷓鴣  
激水養成千屬  
玉長林麓橫溪曲  
卻向此中開竹屋  
閑官殊不俗  
所喜更無拘束  
昨賜萬條官燭寫  
三朝要錄

江南好

時將乞假南回作此寄里中親舊

鄉園夢昨已到雲溪  
生小樓臺三徧換  
柳邊門巷亦全非  
新綠浸簾衣

鄉園夢昨已到花橋對舫乍憐詩社歇陸祁生每與丁  
叔候兄弟及兒

子節孫等聯  
吟時並遠出隔河添得酒旗飄燈火徹清宵

鄉園夢昨到樣舟亭小港蓄魚橋半圯荒庵燒筍戶全  
扇僧老厭繙經

鄉園夢昨到放生池煙柳綠交楊令宅楊大令西河  
宅在池側水

雲碧菴謝家祠清景待題詩

鄉園夢昨到驛樓前障眼市塵高百尺關心鄉語別經  
年真個說歸田

鄉園夢昨到石橋村高阜欲盤雲外塔神魚時拜竹閒  
墳松子積臺門

鄉園夢阿弟屢邀呼新築水亭招社燕別營山冢葬童

烏猶子明  
男近殤作達且提壺

鄉園夢好友遞將迎木杪軒中搜逸句竹初庵內證長  
生奇論尚縱橫

鄉園夢外舍叢依依榆萊綠迷穿徑水薔薇紅隱上樓  
梯花發子規啼

鄉園夢羣從亦翩翩坐我小樓敲句好輸卿長日枕書  
眠屋外水周天

前調 抵江南境作

江南地一碧已無塵小市雨晴初試馬長隄星暗乍逢  
人猶剩一分春

江南月不厭徹宵看無奈乍圓還乍缺未妨輕暖與輕

寒長凭玉闌干

江南岸屈曲漾蘭橈舊事乍思情漠漠夜程初急雨瀟瀟已過驛西橋

江南艇鷓鴣與同飛待得柳稍殘月出水禽蹤跡已全迷留得夜鳥啼

江南屋低小只如船一樹石榴初吐艷四更銀燭尚高然隱隱笛聲穿

江南路從此遂幽尋韓偓艷詞容寄意陽城下考亦甘心別念撫孤琴

江南夢日昨已全醒黃卷誤人頭欲白綠楊窺客眼猶青閣小戶仍扁

江南客天末溯歸蹤漁唱便須蘆笛和菱衣仍待柳絲縫鷓鴣且從容

江南侶說著已銷魂松栢徑中尋舊友鵲鴿原上指新墳尤歎此衰門

江南節屈指已天中絳柳乍青蒲葉綠楊梅初紫杏花紅水淺試雙龍

虞美人

黃昏獨坐闌干左竹葉深深鎖橫陳玉體見何曾知道紅窗六月不燒燈夢中嚙語愁人覺小婢都辭卻無

聊長自睡曹騰懊惱一鈎殘月鬢邊升

江城子

生疎廊屋幾曾經意忼惶步伶仃偏是半邊團扇有流  
螢縱向曲闌深處躲防照見一星星

紅闌干外路三千病懨懨說當年贏得半生憔悴半生  
眠只有畫籠鸚鵡好渾不記有從前

采桑子

別來已覺無情緒放了風箏過了清明總向閒門冷巷  
行何時約畧主春夢多比流螢少比疎星春睡曹騰

白晝醒

轉應曲

天上天上誰把兩丸安放東西滄海漫漫出沒真如轉  
丸丸轉丸轉天也有時不管

明鏡明鏡看了有時仍聽吉祥善事多般頓覺愁顏喜  
歡歡喜歡喜儂與鏡兒知己

春夢春夢誰向小窗分送夢中說夢尤疑身外分身絕  
奇奇絕奇絕魂共燭花凝結

千里千里只在離人足底別來吳苑花香又復燕臺夜  
涼涼夜涼夜酒薄衾單多謝

虞美人

人人愛說芳菲節更愛團圓月箇儂心事獨嬌憨卻喜  
花看春半月初三長安道上金貂集青紫客人拾到

來生怕說頭銜只戀年時憔悴舊青衫坐觀蓮葉  
照君怨

原是一般年紀可可算他作弟記得小名無衆中呼  
入夜畫樓先鎖百計要將人躲何意學生踈上頭初

柳梢青

纔睹千秋又邀門艸且漫藏鈎衆裏聰明箇中機警格  
外溫柔日斜剛下粧樓招女伴更番出遊鳳尾墩邊  
鵝毛洲上龍嘴灘頭

西江月

夢裏鶯花繚繞愁中風雨廉纖一般時節症懨懨相對  
燭花呵欠小膽疑聞鬼語細心時卜神籤病兒生怕  
不增添百計把人排陷

減字木蘭花

乍談心曲何事小名呼小玉彈指年華未比梅花比杏  
花最憐同調八字果然生剋肖判與他生自有麻姑  
肯玉成

蝶戀花

閒日偶從妝閣偵聞說驚鴻險被袁宗聘私語又防人  
竊聽團圞只指隨身鏡情短情長何自定除了今生  
更把來生訂一晌遲疑還未應喃喃只說心腸硬

酷相思

贈俠士

日晚黃塵都似織徙倚徧樓南北便四海無家歸未得  
一劍也千金直一騎也千金直耻向人前稱羽客况  
肯談天釋任醉眼昏昏青轉白天上也誰相識地上也



誰相識

醉春風

好把春衣換更舉離觴勸眼前誰可寄相思算算算指  
上先掄心頭久嶽口中難喚合是人天眷莫更情懷  
亂個儂只怕太酸寒看看爾許年華這回風格那般  
詞翰

羅敷媚

年來情事誰能識神也瞞他佛也瞞他小婢依微道着  
些無端兩地難牽合心在誰家身在誰家夢裏時愁  
去路賒

又

秋千架下分頭走姊住東谿妹住西谿只望秋千影不  
迷更闌重到秋千下月也低迷露也低迷畫索斜拋  
烏夜啼

長相思

風蕭蕭雨蕭蕭窗裏無人響玉簫紗燈壁上搖夢無  
聊醒無聊窗外荷珠落亂跳游魚蹴浪高

木蘭花慢

秋夜重愁團飄書  
屋示蔣二振三

只團飄書屋仍一片挂斜陽算杏已摧紅蘭先殞紫桂  
尚杼黃情情那邊門巷歎簾衣何短艸何長百徧欲尋  
歸燕幾番試問寒蟄十年羣從半淪亡頭白剩蕭郎  
縱見了桃根尋他菱角也費猜詳平時枕書眠處是何

人重與攏繩床酒醒佛燈藏慢夢回鬼語沿廊

又太湖縱眺

眼中何所有三萬頃太湖寬縱蛟虎縱橫龍魚出沒也  
把綸竿林威丈人何在約空中同凭玉闌干薄醉正愁  
消渴洞庭山橘都酸更殘黑霧杳漫漫激電閃流丸  
有上界神仙乘風來往問我平安思量要我黃竹只平  
鋪海水幾時乾歸路欲尋鐵甕望中陡落銀盤

念奴嬌

生日東西家

半秋纔過不多時到了初三新月八字雙飛胡蝶好生  
與菊花同日剛欲題糕仍邀說餅且把書聲歇齊肩齊  
歲那人先占佳節猶記七夕樓頭穿鍼簾底腰瘦頻

頻折知道個儂勤頂禮偏喚小名何必笑靨方開愁眉  
更歛梁燕防饒舌燈花解事雙雙紅蕊偷結

菩薩蠻

贈俠客

偶然來預朱門窵身輕只比梁間燕鷲地出人頭燈前  
尚閃眸一腔填恨血七首懷中熟座客酒遲乾先防  
冷眼看

木蘭花慢

已未中秋內城  
南池寓舍作

歎八年此夜移八處看陰晴算幾載持衡雨番入直一  
度歸耕西風欲催人老趁乍寒刮得鬢星星已被月中  
人笑從今莫更多情依然薄醉擁桃笙如水玉階平  
只三十年前境難依約夢不分明沉思那回塵劫把深

杯都向夜臺傾一例碧虛解事半宵霞采橫生

臨江仙

恭纂 高宗純皇帝實錄第一分進  
呈擬欲乞假南下偶此書事

水王韻平

人說綠鬟青簪好可容仍殿朝班玉堂官燭影闌珊昨

朝書已 奏明日棹當還 天上樓臺曾小住明湖如

帶回環夜涼偏欲夢鄉關屋前雙疊港屋後一堆山

琴調相思引

歸燕

一樣樓臺夕照昏杳無心緒入朱門欲飛還止銜得舊

時恩 差喜故巢同海上好春仍得話溫存倘逢精衛

可許代招魂

減字木蘭花

夜涼人定正好明心同見性一縷茶煙透到梅花小閣

邊 休休莫莫夢好正嫌無着落與我周旋莫門眉梢

眼角禪

滿江紅

贈雀三瘦生

十八年前相見在謝家庭院驚一揖玉梅花底與花同

顛葛塢東西山水窟劉綱夫婦神仙眷便匆匆從宦向

湖頭湖冰泮 茗雪上頰開讌荆郢路頻傳箭只悠悠

七載幾曾謀面蔥嶺南頭時入夢蒜山北下仍相見歎

人生聚散總無端空中電

昭君怨

苦雨

窗隙與誰同坐咒雨鴉鵲兩箇兜起卅年愁舊南樓

暫向曲屏高臥夢又把人顛簸睡覺夜燈青影伶仃

滿庭芳

雨窗簡蔣振三昆仲

撇卻千山行完萬水偶來茅屋勾留又教聽雨日日捲  
簾鈎畢竟誰人過訪三兩客兼雜鳴鳩門扁響奚奴睡  
熟親爲點茶甌一颺颺風乍急紙窗搖動無異扁舟擬  
乘流徑去隨分清遊東海波臣尚笑曾見汝大漠西頭  
祁連冢何時築就埋骨此荒丘

念奴嬌

元夕醉中復至城東憶吳宮樓

餘生何意孽蠻牋重寫孝侯風土醉我百杯元夕酒更  
聽一堂簫鼓我醉還歌歌仍引滿說盡邊亭苦妻孥雨  
泣昨年投畀豺虎殘夜出戶聞行城門東去彌望多  
平楚一領綠篔收拾好恰稱瀟湖漁父踏曲歸來兒童

指我睂目皆飛舞爲言此客與樓與月千古

前調

錢竹初松菊猶存圖

十年歸計只剛剛長就滿籬松菊買得半園工位置儘  
可賞心娛目忽悟浮生因求大藥并禮西天竺回頭自  
望髻毛鏡裏先禿一差幸服食祈年迷途未遠末路仍  
堪贖莫待扁盧俱束手醫雅難于醫俗一逕香清一簾  
花好一味茶初熟這回休誤白駒頭上行速

因而自省笑先生曷不工于責已萬里歸來行樂好何  
以埋頭不起幾尺牙簽三分燈影一寸書堆几蠹魚規  
客先生今盍休矣倘冀後世名乎三唐兩漢試問誰  
堪擬況是傳人皆有命不朽古來能幾文仿淵雲經研

鄭賈詩筆還蘇李君應誚我愚公愚更無比

沁園春 喜趙味辛乞假歸里即送之

司馬江州從事青州頭銜若斯歎機庭綸閣鳳池遠奪

治中別駕驥足安施竿上綠魚磨中旋蟻可是先生宦

興詩呼驢問儘才堪令僕汝好為之 雖然樂已難支

只白髮高堂健飯時算阿奴碌碌無慙令弟深源咄咄

尚有佳兒跨鳳清才乘鸞仙客 君諸壻皆有才名 都唱微雲山

抹詞掀髯笑趁唐灣風月且倒金卮

三十年前稱詩少年惟君不狂看元卿三徑招邀二仲

謂黃仲則 宏農別館欵接他楊 楊介社蔚之元之叔姪

左仲甫 系出山陰故 陌上班騅堤邊畫舫新樣蠻箋古錦囊今

消歇已半登鬼錄半下名場 別來萬里投荒幸絕域

初歸鬢乍蒼便依然花鳥何時索笑依然樓閣何地傾

觴蔥嶺煙雲祁連冰雪夢裏都憐徹骨涼君知我是愁

多易老

恩重難償

金縷曲 題萬大令廉山請纓圖圖作于大令年十五時

後二十年大令隨畢秋帆尚書姜杜香侍郎勳

辰州紅苗 此客真先識趁升平時時留覽九邊阨塞試問請纓何

太早髮正垂垂覆額天下事引為己責手理韜鈴仍躍

馬果湖湘隄建非常績勳勒徧壺頭石 丈夫自信饒

奇策况生平服膺所在劉琨祖逖如許少年能十輩分

置楚南川北談笑盡荏苒之澤只我感

恩思効死便歸耕尚枕投荒戟隨爾去殺殘賊

鷓鴣天

秋杪雲  
溪曉望

谿光未是廿年先一樣闌干到眼前風急萬鴉爭古木

露寒獨鶴舞長天情漠漠淚綿綿舊家仍倚白雲邊

尋春去問堂前柳破夢來穿渡口煙

滿江紅

中秋夕雨

窮海歸來正盼望此年此夜還準擬半宵燈市半宵水  
榭三徑久憑風伯掃萬錢欲向天公借更持螯左手右  
持盃人間暇雲驟暗重簾罅雷驟起層檐下忽蕭蕭  
瑟瑟瓦溝如瀉移樹鵲驚巢乍圯走橋人嬾粧先卸歎

街泥滑處約良朋稱多謝

西江月

九月初七日  
雨窗遣悶

門外愁霖似潑帳中清淚同揮一年多事上心來不飲

已防先醉明歲重陽何處去年此夕方歸人言死別

復生回今日正當周歲

鵲橋仙

日斜時候日斜年紀又是日斜風味斷腸言語不須多  
况正值斷腸天氣前宵牢記昨宵牢記此夜更須牢  
記半生寂怕說銷魂敢再到銷魂田地

江城子

柳絲南北罩通津水波勻月痕新卻到晏公祠畔暫遶

巡偏是畫船紅燭影頻照見夢中身

又

播錢堂上記還真是穠春是花晨依約別來如影復如  
塵安得學他雙燕子來與去不隨人

壺中天

和女史歸佩珊韻即  
寄令叔方伯伊犁

從天試問恁詞華只付掃眉才子百歲含愁容易過經  
得幾番彈指未盡名心先拋世味且復營書史回看海  
水比來清淺如此猶憶絕塞歸來君家癡叔憔悴何  
能死寥落雁鴻千萬里憑寄阿兄數紙并說中閨尤憐  
嬌女詩思清如水比來相見怪他風味都似

又贈僧鐵舟

浮生如夢記念念滬瀆城邊小別石爛海枯重握手相  
對各驚華髮瓶鉢隨身才名蓋世詩畫書三絕鋼經百  
鍊鐵舟果否如鐵今日短簿祠前長洲苑外客路將  
鋪雪一領袈裟渾欲破賣字依然得活極目天南關心  
鄉國鞞鼓聲纔歇何時飛渡醉眠黃雀樓月僧漢  
陽人  
浣溪紗  
病後般般總率真見時故故不溫存已教銷盡昨宵魂  
開士心情居退院美人顏色賦長門年來偏重過時

人

鷓鴣天

百罰深杯總不辭忽從酒半透微詞前房阿母都瞞卻

只許青溪小妹知 重攬鏡更添衣衆中偏覺語支離  
不知天上頻攜手故說人間會面稀

臨江仙

六月二十日詣學宮觀諸生釋菜并登尊經閣遠望

憶向校官稱弟子春秋祀屢追陪仲丁六十六又三回舊  
題名已暗明倫堂有進士舉貢題名余皆預焉親爲拂塵埃 尋徧講堂  
兼學舍兩株列栢誰栽尊經高閣暫時開青衫皆後進  
紫燕亦新來

浪淘沙

壬戌中秋夜起望月不見時在洋川書院

纔歇雨冥濛月甚朦朧玉塔處處有吟蟲咫尺好山都  
不見說是秋中 少壯去如風老尚飄蓬別家還喜住  
江東金粟玉簪開已徧閒卻簾櫳舍間廳事側多此二花

蘇幕遮

醉題焦山月波臺

屋禪關樓法界十仞高臺更在危樓外奇氣尚能除百  
怪穩坐蒲團且受江豚拜 舉杯避吟句快乞篆題縑  
總仗孤僧介一日已償詩畫債興來不學前人派

瀟湘夜雨

汪秀才次玉屬題夜意圖時余悼亡日近與君同病後率賦此寄意

悟徹前因銷磨塵劫又來樓上孤眠微黃燈影鏡臺偏  
聲慘慘寺鐘初動光黯黯簾幕斜褰無聊境我方匝月  
君已三年 兩愁相校望夫山外愁更堪憐只投荒歸

日病正纏綿渾欲訴金戈鐵馬念誰禁激管哀絃忘情  
好他時同穴百歲鎮隨肩

八聲甘州

夢亡婦



向空房盡處及燈昏缺月影橫陳算傷離感逝殘冬既  
爾何況經春打疊半牀衾枕時爲拂纖塵奩鏡都安好  
與照歸魂 畢竟瞞卿何事只夜臺相值問尚殷勤歎  
襄王孤館久已斷行雲想闌干東西十二便夢回總欲  
一周巡梅花句從今不賦防要含顰

前調

常熟訪吳祠  
部竹橋賦贈

又匆匆扶醉入山城雪意釀寒更算玉芝堂朽赤厓閣  
圯紅豆莊傾今日劍門吾谷都已屬先生壓徧江南北  
壇坵崢嶸 小弟頭銜一品但才名艷絕似遜難兄羨  
盈門弟子分日門心兵更傳聞量才尺好隔絳帷親授  
與雲英憑誰有平生奇福來入詩盟

小重山

夢不分明醒可憐小樓簾半卷月初弦喘聲低緩髻斜  
偏朦朧坐誤認卜金錢 衾薄忍添綿舊曾揮淚處錦  
仍鮮擁來都恨夜如年無眠客今轉羨長眠

如夢令

十三日侵曉  
過碧浪湖

龍氣出波冉冉鴻鴻鷺絲皆閃海日未升時幾片斷霞  
如斬休喊休喊驚破一羣鵝膽  
剩得曉星數顆芒角出同諫果尚未破天光水碧盡將  
魚裹孤坐孤坐千尺浪中一我

菩薩蠻

十四夜過  
南潯鎮

高高下下游鱗繞侵人不已侵巢鳥一碧作魚天空明

不起煙 東西樓似織出水高千尺玉手盡垂空長廊  
接斷虹

減字木蘭花 十五日五鼓  
過平望湖

偶開窗扇破曙鵲聲波上亂百頃湖光捲上先生六尺

牀 雪花難集倔強水蟲多不蟄落月團團東海魚龍

尚愛看

昭君怨 吳江道  
中夜行

惹得夜烏難住萬點鬼磷穿樹似復有人行散如星

鴻鴻鷺絲屬玉齊傍水仙祠宿宵半忽爭鳴學巡更

清平樂 湖中  
迷道

風風雨雨且向前湖去欲問來船船不遇進退總愁無

據 忽然香氣縱橫半空舉手將迎岳瀆貴神抗禮算  
來只有書生

浣溪紗 萬頃橋

萬頃湖頭萬頃橋雨簑煙柳共飄搖水從天外綠周遭

宿火照將鴻雁暝曉霞烘得鷺絲驕是誰來伴客無

聊

鳳棲梧 戊子秋杪至虞山赴邵先生荀慈之喪時亮吉  
結禱甫三日今復以事來遊則距悼亡日甚近  
也感而賦此

憶昔來遊才合卺新婦三朝尚向紗帷隱小別乍歸爲

整鬢對人言語尤奇窘 三十三年真轉瞬未比松筠

早向深秋殞紅豆莊前紅淚隕回途魂已銷將盡

虞美人 寶帶橋

蒲帆過盡危橋百徑縱無千尺便將蟬螻屈成梁只惜  
都無寶帶一般長 冷泠橋外光如電雲朶裁成片頃  
傳三萬六千寬聞說眞仙不穀放漁竿

憶秦娥

殘冬甚暖夏蟲  
並出感而賦此

羊裘熱營營案上蠅聲出蠅聲出醉螿當漉凍魚須徹  
煤逋藥債都應逼商量艸艸營除夕營除夕年年共

命此年獨活

清平樂

孫解元子滿屬  
題雙紅豆卷子

夢回永晝滿地春光皺半領綠衫花氣透胡蝶趁香來  
嗅 文窗特與丁寧東風格外垂青欲配一雙紅豆除

非天上雙星

浪淘沙

夢入小紅扉露灑簾衣鏡奩殘月影微微偏是獨眠人  
帳外胡蝶雙飛 小膽更多疑怕踏層梯畫屏深處認  
依稀七尺紫檀香案上誰共扶乩

前調

斜照鬼門關落月彎環夜臺可有望夫山生怕瘦魂扶  
不上添箇紅闌 推枕漏初殘朱淚斑斑寒宵何止夢  
能還地下若無埋恨處仍到人閒

十六字令

拚歷徧長廊耐曉寒梅花瘦不厭百回看

聽一雁寥寥下遠汀荒寒境月黑鬼燈青

休斷送春人不上樓三更夢和月挂簾鉤

遲已是踈鐘報曉時山禽影藪藪落高枝

念奴嬌

未至常熟四十里值大風雨

三更向盡忽驚呼飛去蓋頭竹笠鐵馬金戈聲乍沸波  
峭半篙難入絕壑魚龍陰厓神鬼空處通呼吸推蓬起  
望一湖湖水全立只有卅里遙程前舟顛簸側搶回  
須急病羽樓頭秋蟲砌下纔復商量蟄愁人無寐殘宵  
短夢千摺

水調歌頭

自吳江常熟回舟欲至婁上作

性既談釋又不學神仙半生纔一彈指何苦慕長年

卿自埋憂地下我欲寄愁天上索醉向雲閒自有十洲  
客供我八方錢胥江口雪溪畔尚湖邊回頭三十三  
載舊事散如煙昔日蘆簾紙閣今日梅花紙帳清冷耐  
孤眠短夢乍回處殘月影床前

前調

偶厭玉虛住屈作世間人人生誰寡快意良夜與良辰  
我欲花開地下更使水流天上耳目一番新倘荷化工  
允寧懼俗流噴又誰願朝列闕叩羣真百年三萬多  
日臥足幾回伸九野分鋪列宿五岳填平四海從此罷  
揚塵萬事等閒耳無鬼亦無神

點絳脣

題折枝圖贈友

遠恨新愁半春已覺難消受海棠花瘦鴝鴒雙雙咒

十二紅闌春氣應全透關心否鶯前燕後定有人垂手

賣花聲

過三又河  
贈練塘僧

洲樣亦如瓜淺泊江沙二分月已透窗紗留得雪泥鴻

爪影都為梅花稍遠市樓譁港到三义山僧親為煮

山茶白髮一龕忘世久與證年華

浣溪紗

梨花和金  
手山秀才

一棹春遊蘇小家紅紅紫紫信方賒玉闌干外幾枝斜

仙子衣裳原縞素美人顏色本空花淡雲流水證年

華

望江南

過京口訪駱佩香  
女史率成二首

忘世事只有杜蘭香焚得一爐煙未燼萬帆門外去來


忙吟客鬢都蒼

淒冷處招得女生徒

女徒殷姓其姊為故尚書和琳側  
室琳死姊以身殉其妹流落無歸

因依佩桃李盛時顏果莫海山佳處語模糊猶憶故尚

書



更生齋詩餘卷二

陽湖洪亮吉著

機聲燈影詞

蝶戀花

題畫

絲雨絲煙湖上道夢裏年華深淺誰知道天上玉梅開  
過了又教人世東風早春事及今偏艸艸有分披圖  
月與花枝小獸立數峯吟句峭乾坤分半輪裏抱

鷓鴣天

學畫敲詩興轉闌更從花裏響銅環雕籠出語偏生脆  
翻遣鸚哥課小蠻顏冷落致闌珊萬重密意總相闕  
鄰家姊妹邀同坐說夢先消春晝閒

點絳脣 春病

隔箇紅窻強將八字排來看自憐魂斷欲把他生算

支枕應難且復憑詩案誰相伴喘聲低緩虧得鸚哥喚

風入松

題春山  
獨往圖

翛然一境迥難攀幾家人住谿灣踈籬敗壁憑誰補借  
亭亭隔岸青山小史亂頭粗服先生雨笠雲衫 生綃

忽破酒人顏清夢置其閒谿塘正好營高閣待他時風

月人還仲蔚蓬蒿須補劉安鷄犬都刪

醜奴兒令

海棠小院春深見一晌難描千種無聊容易將人挂眼  
梢 低徊不解傷春句一卷離騷纖手難拋自把蠅頭

小字鈔

紅林擒近

紅錦香猶淺白閒春正長睡起懶無事鬢花碍釵梁春  
衫攜來早皺呼小婢號沉香屈指挑菜年光待畫艇尋  
芳 麗句傳鸚母名絲繡雁娘妝樓無事鏡邊更展縹  
緗算傷春未敢閒愁無據背人私自禱海棠

點絳脣

送春

又是春殘海棠花外游絲亂淚珠成串待把年光換  
惜別匆匆鎮倚閒庭院闌干畔綠愁紅怨約畧傷春券

漁家傲

題陳野  
航畫竹

午餘睡起茶初熟一竿愛寫玲瓏玉葉葉枝枝濃淡各

還須屬三更窗外秋聲莫  
娟娟穩稱輕綃薄圖成好  
置闌干角待得晚涼新雨足  
天如沐月痕倒挂梢頭綠  
酒泉子

驀地行來一樹妍花離地出  
雕闌排玉砌陟瓊臺  
四

更玉笛聲三弄  
肩上海華堆重與雲飛  
隨月上逐風回

探春令

題侍女屏風

晚妝初罷怯春寒  
約伴花閒步正一縷愁來無著處  
把十三絃偷訴  
玉簫斜倚林閒路  
想個儂丰度到宵深  
霜月空濛錯認作梅花幾樹

醉桃源

前題

薰風池閣簾微亞  
日暖豪犀偷卸行到綠沉窻下一樹

榴花謝  
滿樽蒲酒人初暇  
結伴消他長夏  
采戲又還

輸卻些事關心者

紅窻聽

前題

一院飛花空自晝  
看結束春弓閒走隄畔  
盈盈堆絮厚  
襯得鞦韆瘦  
簾幕深深垂錦繡  
闌干外總燒金獸  
昨宵霜冷今宵風驟  
屈指剛三九

買陂塘

題錢孝廉澗川鸚鵡媒傳奇

爲多情青衫血淚  
生生判向愁老冰絃  
誰把傷心譜  
又早別懷縈擾  
幽會巧君不見茫茫  
碧落相思鳥芳心寸  
拗待密約重圓  
愁盟暗續一一淚珠繳  
銷魂處我亦青鸞  
信杳年來暗損  
懷抱江南江北傷春  
恨付與斷腸



衰艸辜負了是舊日金釵鈿盒情多少閒愁待掃又一  
兩三聲無端逗起清夢隔簾悄

河瀆神

迷藏

遊戲共登壇窄靴小袖衣單身輕總欲避遮攔空裏時  
時指彈 同是曲欄何處躲慧心先向偏左女伴盡皆  
藏過百忙何苦尋我

清平樂

楊花凭早不待春歸了可惜玉人渾未曉逗點與他知  
道 晝長人倦敲詩畫屏一枕閒支睡覺數聲搏黍消  
他春日遲遲

點絳脣

花事關心東風吹到茶蘼架燕兒多謝呪得春成夏  
不放春歸斜日簾微亞秋千下游絲無賴又向荷錢惹

鵲橋仙

玉鉤響斷玉簫聲斷更苦玉人音斷清明上巳總無聊  
欲飛去晴江南岸 小園春半小窗月半尤喜小樓天  
半黃鶯紫燕不曾來只蝶螭與人作伴

望江南

幽夢破斜倚小紅樓又是卷簾人不見滿街絲雨糝春  
愁綠暗幾重流

昭君怨

江行

帶得綠篔鐵笛消受短篷秋月帆影入江流小于鷗

目極楚天遙  
甸潮接海門  
如線一點着  
林梢是金焦  
減字木蘭花

垂垂一樹曾見  
個儂珍重處  
已分成陰頭  
白蕭郎恐不  
禁還憐飛絮  
一樣東風飄  
泊去郎已沾  
泥莫趁流鶯  
是處飛

相見歡

夢中作

無端踏卻輕鷗  
共清遊夢裏  
居然東海向西流  
雲中  
屬風中  
燾不能收  
幸喜天鷄初叫  
始回頭

一叢花

林禽喚我作春遊  
煙景逼南州  
藍輿卸處幽吟好  
尋僧話又引閒愁  
無事銜盃有山埋骨  
此外總悠悠  
消沉

白了少年頭  
青鏡惜風流  
江山勝處余歸也  
等幾度白  
玉成樓  
悟徹孤花彫殘  
心字春總不如秋

青玉案

十三夜  
玩月

東風又把細梅  
染看靜裏簾  
斜捲追取十年前事  
轉亭涼月暗漏  
深花滿兩兩傷春  
券如今細雨沿門  
糝幾陣落紅愁欲  
浣鐵笛五更吹  
更慘任他風雨  
任他憔悴再也  
無人管

千秋歲

瓶梅

春來心性花與人  
同命香未拆  
愁先迸一枝聊供  
汝五夜誰相訊  
寂好是百花頭上  
慙慙病晝永寒先  
警骨冷魂尤勁  
花總謝香難並  
幾絲芳意織一  
瓣心香永拚

得是閉門風雨無人省

買坡塘

邵二雲姚江歸棹圖

黯然歸一肩行李春風不遣人住  
姚江雙漿悠悠去去也更休回顧  
天意苦要汝是名山夜雨成千古  
功名射虎只亘亘平生才皆中下  
李蔡豈君伍當年事千佛名經曾數  
一枝原竅高處衫青袍紫都閑物惹  
我酒閒起舞君莫誤君尚有數椽茅  
屋秋風浦萍蹤語汝恐又引先生酒  
闌燈灺清泪滴殘炷

天仙子

溪上鷺絲忙報客玉人遣透春消息  
怔忡相送已嫌遲無可說祇相憶  
門外瀟湖千頃碧

蝶戀花

落梅

白白紅紅開未止一擅孤標卽兆飄零始如此  
人生剛半世問年一樣輪餘子  
入夜春愁爲剪紙屬汝重來  
休昧初來旨多分柔魂猶在水  
五更吟斷梅花詠又

窻外游絲空復漾十見花殘那得人無恙  
莫向酒閒矜跌宕春風已把飛瓊葬  
花未開時愁已釀寄語桃根  
春到休輕放入世有情還有障  
招魂供汝青綾帳

賣花聲

獨客正思家到曉啼鴉灑窻寒雨又如麻  
不放南枝開到好春有些差  
客裏事堪嗟似錦年華幾人紅泪隔

窻紗燕子平生真恨事不見梅花

倦尋芳

春星

寂寥銀闕怪底瓊妃媵他數個三五春宵可許玉階同  
坐人說高寒應讓汝九重天上還難妥咲風詩只咏到  
衾裯被他喚做也知我殷勤看爾駐向樓頭幾番難  
過錦樣連錢一例被風吹墮仙掌夜過防暗摘月盤露  
冷愁輕簸寄新詩先問汝點頭也麼

荷葉杯

病到幾番委頓誰問曲闌旁畫眉頻喚不能住猜是甚

心腸

蝶戀花

啼鳩和  
仲則

艸繡平堤花繡樹如此江南隻影堪飛度畢竟塵情猶  
未悟雨晴簾角聞呼侶倚樹鷓鴣爭笑汝三度營巢  
依舊無家住幾日酒痕兼墨污樓頭催滌春袍袴

前題

鷓鴣

莫向天涯棲苦竹只遇啼鶻歸計須頻屬望帝愁魂魂  
已續此閒樂亦應思蜀何事啼聲常傍屋解喚哥哥  
引起春人獨花到黃陵千度落這回尚憶詩人谷

憶秦娥

春時節春人住處春光別春光別膩紅花朵膩黃新月  
濛濛膩綠千條結樓梯欲上愁三折愁三折文簫聲  
動剪刀聲歇

柳梢青

新柳次高  
東井韻

向曉層巒將煙做霧釀雨成寒鬢綠衫青眉長眼瘦于  
女何干一枝折了重看怪徹底春愁總諳柳宿前身  
萍花再世我亦差堪

沁園春

題萬黍雜持  
籌握算圖

儒林傳耶貨殖傳耶君因併書嘆百不如人一籌還展  
十嘗九誤些子都輸業可拋經讀宜從律且把蒼生經  
濟儲他年看看致君事了更累錙銖滿盤算了還虛  
怕仰屋他年更苦劬只田從玉局須求陽羨家從杜牧  
更創吾廬我謂先生歸謀之婦料理牀頭阿堵鋪先生  
笑有五銖七幣盍往觀乎

摘得新

難得來休教到便回屋頭雙喜鵲久徘徊紅窗故啄墮  
青梅勸銜杯

玉珥墜金環

晝永窻虛嫩寒先把花朝做幾番凝恨上重樓樓又教  
人鎖長自雨篩風簸把春陰當成功課沉思往事判盡  
浮名換他真個寂寞深園小桃也肯留人坐細拈春  
夢寫春愁夢又將人躲知道枕衾孤臥算風光幾曾到  
我年華誤盡到了今番更教難安

東風第一枝

桃花

團汨成花搓煙做骨商量不遣春瘦幾番醉了重蘇依

然十三時候前塵誤汝應一例向風回首笑無端占了  
珠簾肯放玉人垂手 只花也憐人非舊問此度探春  
何後簸錢堂上重來不似那時清晝芳心易逗算薄命  
永供人咒待拈他花片絨來付汝一春消受

八聲甘州

又西風吹雨上空樓點點雜更聲正涼隨雁至宵同燭  
永夢與年更十二鏡雲何處江館聽吹笙多分樓前約  
不記啼鶯 一半塵封玉鎖看碧紗籠處墨雨縱橫只  
蠻箋消息何事苦難憑想蕭郎傷春恁遠料夢魂逗不  
上銀屏須知我青衫泪濕不爲浮名

南鄉子

自雲溪放舟  
至青山莊

藥王廟晏公祠北關剛值午晴時三折水程欣已到都  
贊好門外水田門內沼

花塢曲月廊周半塘煙雨幾時收百步小橋隨鶴過思  
久坐翡翠北軒晴日墮

長亭怨慢

蟹

猛霜風漸肥郭索是處橙香薦他黃玉記得年時酒徒  
醉月小樓曲深盃浮綠澁地向天公祝臣願把浮名都  
付與蟹螯添足 稻熟漸燈明深港糝破一溪寒綠鱸  
魚便美怎占得九秋名目第一是左手須閒怕明日故  
人相速只紫蛤紅螺風味幾堪作僕

金縷曲

寒夜重光齋頭看秋海棠因言前曾于花下掘  
得古觀發之儼內收宮嬪也余感其事因併賦

之嬪蓋齊梁  
時宮人云

燭冷人初醒正虛廊角聲吹徹商聲又警籬落寒花開  
自好露點欲斜仍整粧慘淡玉人微病不向春園誇勝  
事伴艸根菜甲三秋永其下有波如鏡 千年舊事思  
量猛被西風吹將世換泪珠紅併一半齊梁遺蹟在漠  
漠土花填井待說與古懷誰省落月微黃天乍曙向闌  
干逗出銷魂影重認取劫灰冷

玉燭新

窺簾新月小卻數朶花枝照人寒峭新詩寄與雙環巧  
故把幽期漏了文鴛堆枕密意取夜香薰好又早是玉  
漏星星門前乳鴉啼曉 紅箋付與殷勤只此恨平分

幾時堪繳歸期及早重到也不是玉簫年少萍浮絮裊

試逗點與他知道須記取錦瑟年華暗中易老

鶯啼序

闕神武廟後有隙地里人別  
構諸葛忠武祠落成謹賦

丞相祠堂看古栢陰陰翠繞重來處一瓣名香空裡晴

絲自裊黃石兵書吾懶讀青田洞府愁難到只先生志

業今古幾人同調 憑高回首炎精中燼天意殊難曉

聞說定軍山下翠羽靈旗山昏月黑鼓聲猶惱陰平貽

悞夔門敗踵滿盤都錯何須說更譙周黃皓知幾早相

隣壯繆遺祠未了忠心此時重表 茲地當年紫髯虎

踞更周郎年少柰江山數著殘棋着手便教輸了把荆

梁十郡名區輸織屨小兒坐嘯尚躊躇北定中原南清

江島當途高也往日紛紛割據算曹瞞尤狡匹馬過  
秦中早鷄筋全拋虎鬚重燎巾幗謀臣彈碁胄子一揮  
羽扇愁俱倒只遺恨在五原秋艸十年深計擬將赤帝  
關河重藉手還高廟  
法駕導引補赤城韓夫人詞  
天上樂天上樂博戲更藏鈞怪底燭龍呼不醒兩丸日  
月覆金甌螢火照清秋  
雲漠漠雲漠漠飛渡赤城梁摘取列星歸北斗倒傾銀  
漢入西江天闕費平章  
銀漢畔銀漢畔織女起高樓玉作簾衣花作座海雲爲  
佩月爲兜纒縵坐牽牛

借勝侶借勝侶仙閣坐虛無一賦玉樓猶未竟人間甲  
子總糲糊長爪比麻姑

點絳脣次黃仲則韻

尺五荒墳小桃一樹傷心艷寄將花片沒個人兒便  
芳艸多情引他歸騎尋教遍糲糊見月殘如線霧隱傷  
春面

如夢令

簾外日遲風簸簾內粉消香澗未慣是檇蒲輸了更拋  
金鎖還我還我莫被小鬟猜破

摸魚兒清風亭故址

又斜陽晚林一抹天空飛破歸鳥危亭覓遍蓬蒿徑咫



尺謝家山到吟未了算好景如前好句還輸眺初三月  
早看一縷吟魂寒鴉爭瘦逗去碧波小當年事此地  
放歌孤嘯狂來幾側烏帽詩名天地成何補身後一椽  
誰保吟愈峭把長句風前漫博先生笑思君欲老怕騎  
鶴還來此間亭上留得醉中艸

青玉案

過凌敲  
臺故址

凌敲臺剩荒基也雨洗石苔侵瓦到日短衣尋客話庚  
郎年少衆中爭羨不醉看盤馬孤城陔築寒山鱗城  
裏猶聞暮潮打休怪客愁容易惹那邊人語者邊雁叫  
月照荒荒野

減蘭

聞遊采石早起披衣看曙色不敢窺簷鳥鵲南枝夢正  
甜酒衫芒屨二十男兒工跳躍一縷吟魂先向風前  
逗早春

金縷曲

清風亭  
夢李白

天與人俱老又何爲一千年後此間憑弔一半江山歸  
李白一半分還謝眺我到也祗餘衰艸畢竟微軀容易  
盡覓些須身後名纔好勤打疊零星藁青衫百計供  
人笑只悠悠非公知我恨和誰告金粟前身眞小劫墮  
作五湖年少有夢也不離蓬島猛憶人生何者是只浮  
雲偶寄孤飛鳥殘夢破余歸了

前調

再次汪  
劍潭韻

花是明朝放只萋萋滿城芳艸已供凝望多病年時誰  
付與綠酒紅愁同量且小立雨中惆悵若許鶯花還再  
世拉春人早向春風葬簾蒜揭心旌蕩樓高總伴閒  
雲上有當年鏡盥衫誓遂懷琴況可惜韶光都健在春  
到也須微恙莫輸與個儂門巷我比絮泥心更定背天  
桃穩坐青綾帳塵夢覺釵鈿響

前調

蠟屐嫌疎放任些時殘紅剩紫幾曾凝望廿載可憐青  
鬢改江水未勝愁量春付與別人惆悵我慕靈魚能再  
死趁餘香好伴殘編葬渾未管流鶯蕩聽歌人在青  
雲上只年時招邀勝侶尚牽游况杜牧揚州人已換只

有月還無恙照慘慘幾家門巷尺五桃潭三徑艸瓣心  
香供汝青綾帳添一綫春潮響

前調

倒次汪  
劍潭韻

夢遠金鈴響正無聊紅窻睡足倚帷牽帳羅襪閒行花  
露重頗怯曉風深巷渾悟到玉人春恙薄酒多愁眠易  
醒間樓高更有何情況梯隱約難重上傷春早怕春  
飄蕩把泥金書成梵字伴花同葬一例有情應解取花  
也對人惆悵已開滿十分春量此度見花應背面誤人  
人簾底三年望屬來歲休輕放

醉花陰

爲孫大和婦  
王采薇韻

日午翹塵何處避斷粉零紅且自由天地三十年華愁

也未回頭負春人意 情到九原須更記骨冷灰飛  
灰冷情還膩幽夢壓簾魂壓被醉醒怕沒絲兒氣

浪淘沙

路遠小樓低花柔分飛依然銜恨上重梯何止舊人尋  
不見梁燕都非 愁裏闌窗扉殘月剛西畫簾風破鏡  
臺欹只有曲屏風六扇猶罩羅衣

點絳脣

門艸歸來一窻好夢非無據筆床茶具且復安排預  
強自支持鬼病終難愈誰來覩藥爐煙畔只有風飄絮  
憶王孫

山坳池閣水邊樓一雨銀塘便覺秋長日無人掉小舟

水分流胡蝶閒來立鴨頭

青玉案

算來未到銷魂地偏是識愁滋味欲寫紅箋珍重寄隨  
肩小妹隨身小婢多恐難回避 幔垂不放通花氣又  
早早斜陽把門閉莫道文窗蹤跡祕黃鶯紫燕畫眉百  
舌箇箇知人意

浣溪沙

二首

玉腕偏憐金釧寬鳳釵頻撥獸煙寒萬重心事壓闌干  
杜牧已留來世約蕭郎不作路人看雖然猶覺恨無

端

前調

背面難禁萬種愁見時無語只凝眸初陽一綫下簾鉤  
百計未能通一語暫時曾許共扁舟淚痕和露咽心

頭

傷春怨

劍客

七首飛將過到處人頭疑墮日昨詣叢祠土偶居然離  
坐旋空中如磨電影終難挫騫地指晴空一道采虹

中破

金縷曲

僮窺園從予八年矣體弱善病今年子秋試被落忽  
爾辭去念事傷離不能無作命沽酒歌此調以送之  
衣薄還如紙寂凄凉前宵瑁璫今宵送爾八載追隨無

別事傷病傷離傷死總誤爾朝飢飲水苦訪蟲魚摩象  
籀但論才爾便成佳士休更作朱門使無家我共僧  
居寺只蕭蕭寒雲丙舍尚堪南指入夢總從吾父母醒  
處怕逢妻子况薄命久無人齒明日出門誰念我就飄  
蓬斷梗商行止爾去矣淚流駛

前調

重九日陶然亭作

車馬長安道有誰憐中秋雨暗重陽花少尺五閒亭三  
徑柳亭徑尚餘秋艸更難得紅塵似掃半舫斜陽新月  
影借團蒲穩夢仙人島算懷抱此時好玉山莫向壚  
前倒只空囊俸錢難假酒錢輸了門外鍾聲催客去衣  
上薄寒清峭料理是鋪糟代飽無數樓臺凝醉眼訝籬

頭果大星辰小歸尚有未棲鳥

前調僅得前詞泣不  
忍去復成此闕

暗裏驚聞泣一聲聲無端惹我青衫又濕多病經旬誰  
得似欲共候蟲秋蟄爾似燕舊巢還入典盡衣裘頻擁  
絮更同扶瘦影當風立渾不怕霜華襲八年侍我肩  
差及笑囊空新詩屢付傭錢未給費爾一杯村落酒爲  
我解除狂習說月好今宵初十樓上三更雲氣淨看星  
辰如豆天如笠吟正遠催歸急

青玉案

十一日同人  
飲長安酒樓

臨街樓上冷冷語醪味薄催添糝一院酒人揮不去持  
螯手冷潑醅顏熱繞著筵吟句臨街樓外踈踈樹已

覺秋聲落無數一院酒人招不住來時天慘去時月暗  
繞著城徒步

憶秦娥

寄季仇

鍾已動一聲破我長安夢長安夢世情未了鬢絲先種  
書乍捧故人遲我華陽洞華陽洞丹沙填壙碧山成

豕

浣溪紗

薄暝微醺枕酒瓢病心一縷逐風搖夢無來歷入鴉巢  
初八夜星還照曉十三涼月卻終宵瘦魂尤避出林

鷓鴣

買坡塘

送繆公子笠  
莊至江浦

趁霜風沿林飛徧巢荒去住無據雁聲卻有東歸信切  
莫更留征羽淒燕語道千里同來千里應同去霜鴻未  
許算我願隨陽卿尤避熱各自歎羈旅 天涯路來日  
風風雨雨別離頭起愁緒江南兄弟誰能健羨爾雁行  
有序須記取只紫塞重逢可識前時侶天空欲舉穩待  
爾重來春風三月共看滿林絮

漁家傲

宣武坊前清酒美多錢約客誰來會日午闌窻人似海  
孤劍在萬金難買心無愧 畢竟浮名猶可待少年莫  
學呈身銳鼎鼎百年君誤再棺已蓋幾時贖取從頭悔  
一萼紅 龔孝廉克一寓居晉陽庵側因屬余顏其齊日聞鐘并係以詞

傍禪關構閒亭似舫四面啟疎櫺十五良宵一雙人影  
三千里外鐘聲有多少春人心事柰秋窻黃葉已先零  
借了蒲團繙殘梵頁悟徹鐙檠 我亦能來聽此只青  
衫似夢百倍淒清苦竹疎蘆幽花淡艸此身如在江城  
况惹起寒蟲鳴砌又丁丁蓮漏滴殘更待得蕭齋響寂  
人語還生

摸魚子

龔克一邀遊夕照庵卽展其令弟紫樹殯

正無衣墟頭索醉油車忽引君到愁中天氣還如霧咫尺  
遠山舒眺煙柳道算怕是逢人只是逢僧好無多落  
照但挂近禪房和將夕磬便有暮雅叫 荆高市酒人  
一樣潦倒塵沙埋盡年少江干舊侶今誰在 癸巳秋予與劍潭紫

樹同客姑孰  
至宣城始別  
可惜龔生竟  
天渾未料看  
冠蓋如雲更  
有閒人弔高  
原古廟但肯  
費茶瓜時時  
欸客我輩不  
須召

荷葉杯  
自夕照庵步  
至萬柳塘

三里望中依  
約樓角亭館  
太荒蕪萬株  
楊柳一行無  
風

急戰菰蘆  
林際黑歸一  
片雅點隔寺  
暮鐘聞寂寥  
城

上去閒雲雲  
薄帶斜曛

小重山

舊日紅闌已  
作薪玉蘭花  
滿樹曬春裙  
經過燕子亦  
嫌

貧呢喃語故  
故入西鄰  
寂寞掩重門  
小樓三面暗  
易

斜曛屏風吹  
淨十年塵中  
還有兩小舊  
啼痕

謁金門

送龔曉升南歸卽題  
其長松片石行碑

歸亦得卷裏  
天青雲白不  
誤今宵歸計  
決誤前時爲  
客

屋三間醒夢  
適何止長松  
片石七十二  
峯晴歷歷在

先生窻隙

梧桐影  
將至仙遊  
潭迷路

馬獨來南山  
麓厓上石樓  
纔一閒推門  
且抱神龕宿

玉女泉清無  
極雲外木魚  
聲不停三更  
月向東峯直

臨江仙  
溪山秋曉  
卷子

十里空濛雲  
外水水雲光  
隱回汀寂無  
人處小舟行  
到

來谿館冷秋  
燕語分明  
渾異踏青前  
度至滿坡花  
氣

將迎剩他幾  
樹綠無情四  
更山曙早紅  
葉點疎星

蘇墓遮  
寒禽枯木  
卷子

綠初離紅乍失白釀層雲黃澹初升日空裏數聲禽語  
切似說宵寒約畧明朝雪凍絲黏冰綫結莫折高枝  
恐有東風出轉向竹稍深處歇玲瓏石愛蓬山骨  
臨江仙 蘇州

紅鶴谿山烏鵲館金閨從古繁華三分樓閣二分花一  
分留隙地隨分種桑麻海物新奇爭入市晨餐都厭  
魚蝦等閒吳語六時譁笙歌叢作隊脂粉瀉成洼

玉樓春

闌空膽小愁無侶錦幕時時風欲舉生憎梁燕不歸來  
銜得徑泥何處去三更又是瀟瀟雨剩得燈光青幾  
聚小樓西畔宵無人一片落花浮鬼語

點絳脣

傳粉攤書硯旁小匣先安鏡梅花同命瘦到年時影  
小別生疎問語都愁應更初定爲憐春病偷向床頭省  
好事近

抱處恍如無奈小語心尤怯夢裏有誰知覺紅上雙雙  
頰三更碧月淡紗帷涼把重衾壓欲訴二年情事和  
淚開吟篋

金縷曲

元夕柳子  
廟道中作

綠鬢還如舊又依然長隄風細碧空雲皺艸艸柴門元  
夜到催送斷腸時候幸濁酒數杯還設愁欲成癡眠轉  
醒怕相思一夕人天瘦欹枕處淚痕透樓高往日長



垂袖摘疎枝殷勤記取柳邊花右分半紅窻堆卷軸多  
付個儂消受渾可惜此生難又欲倩雪衣爲懺悔更煩  
他百舌聲聲咒春夢破月如晝

霜天曉角

讀天寶遺事

開元政倦無逸圖先換頰到秋來羽扇無多日賢臣窻  
戚晚更相煽翹奴先兆亂河北河南皆叛何須責哥

舒翰

河湟使典宰相居然忝天子更思康晉還應惜無人薦  
傳箭出郊甸馬嵬軍又變啟豐堂開月偃休專怨長

生殿

臨江仙

八月十一夜雲  
谿晚步有感

猶記石橋橋畔路死生離別匆匆綠波搖月去如風唾  
痕都作血岸柳不曾紅 留得一行臨別語幾生重得  
相逢夜臺沒箇寄書鴻廿年如夢過來聽渡頭鐘

減字臨江仙

十二夜步  
月葛仙橋

十日秋陰情緒減午眠卻喜新晴紅墻千尺月華生水  
明鐙暗依約卷簾聲 谿口寂寥尋渡少酒徒多分飄  
零柳絲笑客眼猶青好天涼夜祇剩一人行

烏夜啼

十三夜

水邊門掩重重海棠紅不信者般顏色墮西風 相扶  
醉相偎睡意惺忪正好一鐙私語伴秋蟲

中年一種情牽病懨懨欲借舊家樓閣訴當年 黃庭

卷丹爐畔學飛仙留得一絲兒恨未生天

小冲山十四夜無月三更後微雨

一種閒情那得知午眠還又起出門遲秋燈替月已多

時三橋走衣袂雨絲絲空外影參差西風吹不斷柳

絲兒呢他燕子說相思還生怕燕子笑人癡

滿江紅十五夜坐雨

百事輸人祇贏得幾番沉醉又苦是宵燈替月秋霖成

歲說餅齋拋荒徑外采菱舟冷青溪內倚闌干聽雨到

更殘何曾睡風轉處枝枝背檐漏處聲聲碎只無端

兜起舊愁無柰白玉盤埋雲慘淡黃金花買秋憔悴擘

蠻牋題恨寄花前花垂淚

八月圓十六日顧唐橋步月

昨宵細雨沿門糝深巷掩重扉繞砌寒蟲滿廊歸燕秋

思依依今宵暢好橋邊樓上人月雙輝曉漏將殘夜

烏啼徹直自忘歸

醉太平十七夜庭桂甚開鄰人復有貽秋葵野菊者獨飲偶賦

葵芳菊芳蜂忙蝶忙小庭節近重陽是秋花總黃

疎枝貼窻濃陰滿廊人閒月午清涼比天邊更香

金縷曲送唐太令蔗園之曠縣任

衣上春雲起記征程錢唐到日好花開矣兄領三州君

作縣穩稱陸家難弟只手版也須隨例昨夢越江東去

好是紅塵不到天光膩官事少看山未京華往日曾

聯騎憶匆匆斜陽古道柳絲同繫丁未春借君及孫一淵如計借北上

幅東風吹上了兩兩金門高第偏剩得杜陵書記捉鼻

功名知不免笑他時我亦神仙吏輸一著早曾計

買坡塘送莊舍人植三南歸並寄蔣太守星仲趙舍人億生莊進士葆琛

又惜騰幾番煙月東風吹過年少寂寥三徑尋遊侶只

有阿蒙還小忘不了是當日曾經擲果蘭陵道一官亦

好看衣桁簪花佩囊囊筆渾稱此風貌夷門路金尊

昨日頻倒天涯尚未生艸同來恁不同將去撓亂數旬

懷抱歸正巧算剪韭烹葵煮筍都堪飽寄聲短趙更瘦

蔣風流癯莊溫藉相憶令人老

虞美人二十夜楊孝廉敬之招集騰光館看桂

艸元亭在雲溪北暇日能邀客寂寥深院倒金尊添得  
幾絲疎雨易黃昏廿年前記題詩處花壓闌干住故  
人多半起雲霄只我閒居尚赴小山招

南歌子古州道中

似柳應同韵疑花未解羞慣拋白足土危樓喜折連枝

果葉插人頭生熟居然異形聲迥不侔怪來行立總

如猴拗得脆蛇寸寸啖同遊生苗有能啖蛇者

人月圓黎平試院作

蠻中三月春光好新雨又新晴纔離豚水仍盤獅嶺又  
抵黎平 昨宵上巳今辰寒食來日清明釀碧成蒼催  
紅做綠有甚心情

浣溪紗

楊太守席上看牡丹作

雲作簾衣絮作塵，向前還有幾多春。艷陽天氣說生辰，  
圓比十三將望月，嬌如二八上鬟人。晚蘭香味玉精

神

又杏花

一晌花枝欲上樓，東風先爲揭簾鉤。和煙和露搭床頭，  
百五時光容易過，十三年紀不知愁。初陽籬落悄凝

眸

菩薩蠻

淇縣道中贈譚上舍子受

青泉落處紅雲碎，馬啼亂踏林聲脆。十里繞淇泉，愁無  
青竹竿。遲行雖數里，已覺唵聲起。知我欲回車，來朝

度曲徐

桂殿秋

飯已熟，忽呼茶滿盤。堆得雨前芽，羹杯到手復揮去。獨  
自開簾看杏華。

三字令

天上月，枕邊來，似追陪。香一盒，時玫瑰，襯珠蘭，和玉蕊。  
髻旁堆，羅幕外，燕疑猜。蝶徘徊，鐘已歇，漏仍催。婢朦  
朧窗隙報渚蓮開。

蘇州府志卷之二

蘇州府志卷之二

蘇州府志卷之二

蘇州府志卷之二

蘇州府志卷之二

蘇州府志卷之二

蘇州府志卷之二

蘇州府志卷之二

蘇州府志卷之二

蘇州府志卷之二

